

壺

天

錄

壺天錄序

自劉向著七略始有小說之名唐宋而還遞相仿倣降至今日博學者  
極意研思大率矜言奇異俾世人耳目一新烏足以資興感哉予瓠落  
不材殆將衰老旅館寂寥形影相弔其藉以釋心胸破積悶者每不出  
神史諸書茶餘酒半聊復效爨徵聞考見信手錄之顏曰壺天錄夫錄  
者爲以壺天名也蓋壺之爲器也小而能分時日之朝暮晷刻之長短  
所謂日同壺中特地長者則壺中一小天也以壺中而論天則不管坐  
井觀天之喻而所見者終小也獨是人生百年孰不同此壺中之歲月  
一壺雖小固有卽天人造化萬事萬物之理而翕受於其中者遠窺六  
合近徵一室要皆可以壺天賅之也予也無楊雄談天之口而藉是以  
言天殆欲卽壺中之天以消此長日耳雖所見者小不免有蠡測管窺  
之謂而興感所在要卽以天道之有常者驗之忠孝節義炳若日星卽

推之災祥禍福感應昭昭亦天理所當然而可以脩德自省矣夫豈徒山川之縹緲鬼怪之離奇爲足以悅乎耳目而已哉但陋劣無文不過自達其間見覆瓿之譏當必不免倘有執是而譽貴之者是則予之所深幸也夫

光緒十一年歲次旃蒙作噩花朝日淮陰百一居士叙於三十六湖官廨

壺天錄卷上

淮陰百一居士著

日月合璧五星聯珠聖人在位應運徵祥此不常有事也乃日與月會  
凡月皆然必見於立冬節數日內則常而奇矣西湖有葛嶺朝暎一景  
人咸知爲初陽臺觀日出處也已卯歲客遊於杭杭友某約至大觀臺  
五更將盡其地向無行人至是則鵠立而鷺望者不知凡幾霜華滿天  
寒威肅殺翹首東望隱隱間有紅光上映曉煙糾縵籠罩無際俄而東  
方漸明紅雲片相推而上竟如霞起赤城紅接霄漢其下又有魚鱗之  
雲勻鋪萬疊旋見有一紅一黑者大如車輪並行而上不差累黍紅者  
熾若火毬光華四射黑者色甚晦暗如潑墨蓋卽晦夜之月魄也繼而  
漸升漸高輪亦漸小黑者漸隱不可諦視但覺有淡墨圓暈依稀尙存  
若紅者則一輪朝旭如樹頭之高挂銅鉦已據父老云日月之行極難

會合雖曰月月皆會而一歲之中惟此一時毫釐無差又必九月三十日在立冬節後數日之內小建則有參差矣若立冬節氣或早或遲行亦不齊是歲蓋巧合耳越人謂此爲日月照言日月之相照而行也要之奇觀快目人生有幾爰泚筆以誌不忘

天象示警人人知之而究之常變所昭人亦不過彷彿比例耳况象又奇幻旌一者乎粵東於辛巳歲三月二自辰至午日旁有連環圈三個日中青黑色圈中亦青黑色其東南一圈只得半環兼開兩又上有雲蓋午後始漸隱占象者謂

慈安太后升遐之兆然究不可解矣又庚辰歲七月初十夜曉垣北門外有農夫胡姓者四更時聞門外犬聲甚厲起而巡視見天河中白氣一道亘長數丈似雲非雲轉瞬間沖出天河髣髴有聲直向西南而沒又是歲三月初五下午時滬上有人見有黑氣一道自西北而東南橫

巨中天長不可以尋丈計俄而色變白約半時始滅隱焉又某歲三月二十日申刻蘇垣見有黑氣二道如虹如霓自東而西亘於齊漢至深夜始隱吉凶何驗占天者當知之

蒼蒼者天凡有禍福之兆懸象於上者不一何愁與笑之有庚辰正月蘇郡哄傳天愁始疑之繼乃知誤傳也蓋於二十二日清晨有聲隆隆似雷非雷有老農早起不獨耳有所聞且目有所見聲發時西南天際有紅光煥發旋成五色燦爛彌天俄頃即散老農識爲天門開主物阜民康數十年前曾有此瑞兆也又都中傳言是歲九月初七日夜聞嚶嚶然笑聲起於天末察其音與人笑彷彿一時聞者甚多皆謂爲天笑主天下太平於是附會者侈陳符瑞言上天旣歡忻鼓舞下方自淨洗甲兵矣此特妄言耳試質之觀天者

天地間奇奇怪怪儘有在尋常臆料外者蘇郡於同治年間某月二十

七八日晚分將及初鼓忽有紅光閃爍照耀若近若遠乍合乍離或疑  
燐火或疑野燒皆非的論燐火則焰不能明野燒則光有定見之者僉  
謂爲神光云丁丑歲七月十七日揚州一士子夜讀忽見北首牆上光  
明若晝以爲鄰人失慎急趨出視之則天半有一紅毬大如車輪華彩  
四射流於雲端隱約有聲餘光越三刻始斂盡焉次日通城轟傳所見  
皆一是夜秦郵驛社湖中光更朗若自南直駛西北後亦無所徵驗云  
戊寅五月初某夜湖畔網船漁子忽見水光接天日月星辰皆隱而晴  
朗如同白日漁子疑係天明方欲携罾駕槳未幾黑暗如故越一時許  
始杲杲出日云戊寅歲六月十五日爲初伏日期杭城某黎明起時殘  
月方沈忽見隳紙微紅疑火警開戶四顧見東北天色紅黃相間掩映  
粉牆紅光愈炮非霞非雲歷一時許方息一時滿天盡作淡黃色慄慄  
乎不可久視種種異色是何祥也願與博物者質之

又有因龍而致火者庚辰十月初金陵鄉農黎明起見火光滿天旋有赤龍由西北來至鍾山頂而沒天大明呼羣至山頂探視草木周圍半里皆焦灼如野燒餘無他異占驗者謂有火災於是家險戶曉先事預防焉要之天道示警豈常人所能測哉存之以爲他日之驗

太史書五色雲見於時爲瑞見之者罕矣然時有之曰卯七月中一夜四鼓時耿耿星河殘月未墜蘇閩外更夫擊柝巡警仰見白雲一片如匹練高懸雲間綴有斗大四字更夫目不識丁第覺見所未見呼噪稱奇兵弁起視時雲已散漫如香烟裊蒙莫可辨明識字者隱約猜摹尙有偏旁筆畫可擬轉瞬遂淨倬彼雲漢爲章於天詩人歌之允爲壽考作人之瑞此殆其類歟但未知太史氏果見而書之否耳

孟冬之月虹藏不見此豈其常也丁丑十月中香港人於薄暮時聯袂登高夕照銜山半林紅葉映射妍麗瞥見天際輕雲冉冉而起日光掩



閉雲端現五色彩虹如橋如帶指顧間日光透出則又成暈而轉日矣  
按虹名鱗練乃天地之淫氣詩人以爲莫之敢指者也時扁孟冬乃復  
見而不藏天道甚遠能妄測耶存以俟知者質之

春秋彗星隕者不一如星隕而雨隕石於宋五皆隕也宋嘗卜人之吉  
凶也至張華爲司空時中台星坼然已有咎徵矣此後彗休徵者蓋不  
一其事如本朝粵督瑞公騎鯨之先有大星如巨球光芒迸射暗室爲  
明落於省垣大東門外衆目共見率相駭異不三日而瑞公卒於署矣  
人咸謂瑞公上應列宿故有此異云又有欲隕不限降而復升者如太  
湖舟子所言則異矣舟子高某素在太湖泛舟爲業某歲七月間每交  
四鼓時天之西南有巨星光彩逾恒夜輒見之殆日月餘矣忽於八月  
十八日夜間聞空際激盪有聲震如霹靂驚而起立於篷首眺望則巨  
星光芒簇簇較往日所見尤大降而復升者至再至三約片時許陡化

電光一道直冲霄漢星仍復位其光頓縮迥不似前時之巨云又有將  
隕而散彩者則殊足異矣辛巳之歲四月五日金陵城人陡見天半一  
星徑逾一尺光紅如火由東南飛至西北落下照耀屋宇明於月色星  
過處隱隱有聲餘光亘天儼若長虹一道約半炊許始滅不知者誤認  
回祿俗云落將星稽天鼓其或卽此要之天道遠人道邇必以星象占  
休咎往往失於穿鑿蓋隕星則天空攝力偶不足耳豈真有咎而後隕  
哉

彗星之見史家多詳記之乃更有隨之而出者辛巳六月彗星見於四  
更時出自東北方不數日二更卽見尾上光芒約有丈餘其時西方又  
一星大如盃光芒射入香港居民見墮一大星於東北方其色藍而帶  
黃愈下愈大亦愈明附近處明如天曉見者咸駭異之或謂彗星出見  
其左右多有是星飛流是耶否耶願與占星者証之

吹噓萬物風實主之乃時有烈風成災者亦天地一大異也同治某年八月中旬高寶一帶忽起大風瓦甍俱飛木石斯拔鷺社湖中魚艇客舟一時盡覆溺衝撞殆難紀數湖茅屋拔起吹落里許外或二三里外室宇完葺者一時皆露處焉最奇者雞兔之屬飛布滿天且於砂石之中見有一物在空中攫拿作勢羣疑爲蓬爲帆忽大震一聲竟將屋洞穿而下驚視之則一豬耳重約一鈞其他墮貓墮犬更不足論矣有南貨鋪木照壁高約二丈寬約丈許亦爲風拔起簾棚連捲勢如風箏愈上愈高向東而去竟無蹤跡父老曰此龍陣風道光十九年曾見之此實非常之異也光緒丙子歲六月蘇州黃埭鄉某家養媳年方及笄姿貌頗娟瀕河浣器忽一陣狂風飛沙走石旁人目眩五色湏臾已失女之所在迄無蹤跡按海颶猝來吹人空際遠至百里者時或有之內地之風不圖亦有此異也又北京安定門外地有名八公爺墳者於某

歲十月十日午後忽一大旋風至有十五歲女子在途被攝至空逾時  
落下半面焦黑勝於墨汚墮地卽斃奇矣丁丑秋川沙亦有風異友有  
自彼處來言甚詳據云八月六日二更時狂風暴雨西門迤南約六里  
一帶村莊房屋吹倒二十餘處壓斃者一婦女耳受傷者百數十人河  
中停泊小船類皆攝至岸灘居民於風雨中眼見火龍一條經過此實  
事也其時滬上亦有風雨不甚急距川沙不過五十里之遙懸異若此  
殊不可解已卯八月初旬寧波風災歷數時之久澎湃之聲宛如山崩  
海沸墻屋坍塌居民尙無損傷亦一幸也廣東省城於己卯閏三月被  
風災雷雨三日不止番禺市橋當大雨時箕伯肆虐大木斯拔沙石皆  
飛鄉間廬舍毀折壓倒者甚夥尤奇者臬署窓瓦亦被大風揭去洞開  
一穴云是豈天之震怒斯邦而以烈風警之耶抑天地山川有不平之  
氣藉風以宣洩之耶要之天道茫茫豈常人所能測哉休嘉之世風不

鳴條吾不禁拭目望之

蒸雲出雨雨之常也乃有奇異雜出固不徒雨麥雨禾者辛巳歲滬上  
傳言於二月初八日下午後見天落黑雨盛之益中色如淡墨始尙疑  
旱乾已久瓦楞積塵隨之而下者這將白磁缸移置中庭仍見如是其  
色黝黑殆如漆然新金山布里士灣附近有埠曰新南威於是歲十二  
月間忽起狂風空中所雨非塵非沙非煙非霧蓬蓬勃勃如釜上氣路  
上行人覩面者皆不相見亦異觀也或謂陰鬱之氣所致然究不足爲  
明論云

昔倉頡造字時天大雨粟史籍中久見之東坡喜雨亭記雨麥於岐之  
陽想非無其事也丁丑十月間黃陂縣夜雨粟形如小米其色黑平積  
二寸餘厚按黃陂是歲春後缺乏雨澤早晚禾皆無收天其欲助窮民  
之飢而後雨之耶是歲溫州城亦於十月中雨紅豆色則紅紫不一

亦不甚勻圓大小與綠豆相仿有識者謂是豆可治時症病人吞服輒效溫郡時適瘟疫先則昏眩吐瀉繼則腿脚中縮不過一晝夜使死能延緩二日者可療天其以此豆救災耶事或有理殊不解格致家謂此乃天空之氣將別處粟豆吸入雲中隨後落下者其亦近理之言也夫雨雹一事春秋屢書之言災也已卯歲杭垣於孟秋一日雷電交作陰雲四合俄而狂風括地石走沙飛瓦鱗中忽有砰礮之聲審視雹點或如蠶豆或如鵝卵大小不一有從大關來者言彼處是時亦雨雹大者幾如花盆小者亦有杯許非特屋瓦爲碎行人頭面猝不及避亦復臉若朝霞不堪遍視某醬園屋極高大門樓竟爲擊破壓傷二人某巨室大樓磚瓦被擊成粉牆繩樞敗壁頽垣傾塌者更不可數計矣更有一應試船急切不能就岸帆檣蓬席風爲揭盡艙中臥客身首皆傷轉瞬間舟中之水幾已及半幸枚獲免噫此奇災也陰怨陽伏乃激而爲

此是在先時調變之耳

雷殛所以懲惡也而於忤逆不孝之子則尤不可赦浙之山陰縣西鄉有張某者生二子皆已授室子出外貿易媳主家政性皆暴戾張曾出假洋餅二十餅於族人族人貧不能歸婦逼翁償與訣曰若不悉數取歸毋相見也翁素長厚向索不得懼無以見媳面乃吞服生洋烟而歸神色慘變二媳猶追索不已隣右觀翁情形告曰爾翁似服毒宜急救之媳不顧毒發竟斃不數日霹靂一聲二媳擊斃於翁之柩前焦頭爛額臭達數里旁觀者嘖嘖稱奇以爲天之果不爽云此庚辰四月三日事也浙湖南潯鎮有某老翁者既貧且鰥生二子各授室輪日就養二子素忤逆朝夕饕餮嘖有煩言翁負氣出門謀食他方逐逐奔馳無所餬口悵悵而歸二子皆不納惟幼媳暗爲留焉分羹以餉翁忿甚一日潛行不歸竟投於河三子以失足沈溺草草殯斂畢雷電交作震死

二子一媳惟幼媳獨免云寶山縣農人某田功之暇兼課其桑老母素奉佛妻厭之日唆某薄供奉一日晨起春陰縹緲妻欲姑同赴獨園姑以赴某庵佛會辭妻聒噪不已某自外至聞之怒甚以香盤等件擲之糞窖中且肆謾罵不啻刻雷聲轟然某已震斃墜地陷三尺許觀者大快嘉興縣馮姓者夫婦齊眉白首年逾花甲生三子均授室分爨各治生計翁媪按月輪食長次子媳均多侮慢惟三媳承順甚至每逢長次輪養月亦必勸留在室竟拂夫意虐甚一日以小故反目兼逐二老筑筑白首痛哭無歸遂相偕投河死三媳痛不欲生旋亦縊死翌旦風雷交作轟然一聲擊斃三子兩媳擲置通衢全家遂絕夫鳥反哺羔羊跪乳禽獸且然人子既不能養且逼以死禽獸不若矣其遭天譴也不亦宜乎吁可畏已

人生隱惡或昧良謀害或貪財報怨而致斃命國法所未及者天則以



雷行誅今昔傳聞殆難勝記茲錄其尤著者龍華市西農人某贅于某翁家亦鄉戶也翁以壻爲子者數年翁忽生子壻某慮分家產遂萌毒死謀事未發雷擊于田間電火盤繞其頂霹靂貫頂而下擊成一洞其妻固不知有此謀也故無恙秀水北鄉楊舍村有沈姓伯仲各授室伯子二仲子一仲妻楊氏悍而貪欲析產伯仲議俟插背後楊氏又起吞產念時楊之母來幫工女與母謀將置毒於飯以斃伯氏夫妻父子入房取礎露置一聲女與母皆擊斃楊母復甦直言其事人始知婦之凶惡先是定議之時雷雨交作電光直逼楊氏之屋楊氏子甫四歲屢呼曰雷將打下矣母懼勸女女悍然不顧故母僅受傷而不殞命云鎮海鄉某姓兄弟四人出洋捕魚船甫進口見一貨船出口故意橫撞出口船頓覆內有一人漂浮水華船求救船夥欲救起兄弟等恐救起生支節乃用刀斷其手其人始逐浪去不數日霹靂忽震將五人攝至庭前

兄弟四人先時亦死，既言其情亦死。慈谿駱駝橋某甲一日在門首，買湯海忽被震死。半學一紙包驗之，乃砒霜也。其婦聞信，出對天肆罵。雷又旋轉不止，婦始戰慄，跪而言曰：是嘗欺弟，婦少寡，姪幼弱，圖吞其產，逼再醮，不從，誣以奸婦，無以自明，雖經死，昨又生惡念，市砒霜以楊梅拌之，將毒胞姪也。言畢，雷乃收聲。江東大河橋某甲一日在江邊，糖船避雨，霹靂自空而下，甲殛死。掌中洞穿一穴，搭膊中英洋六餅洋票數紙，驚疑際江邊浮出一屍，蓋卽糖行學徒也。學徒早起，出外照票查對，乃悟爲甲所害。故于天誅云。西河營有老嫗者，一日見兩幼童撲錢作戲，旁置青蚨千枚，戲畢，忽忽去。嫗拾歸，倚立門前，少頃一童奔回，不見錢，詢之老嫗，置不理。童情急，恐受父母責，投河以死。次日雷雨大作，嫗踰門外，手挈銅錢一貫，卽時氣絕。已卯七月三日，武林門外某農家，擊斃兩少年，一門外一室中，兩人素爲中表兄弟，有己嫁妹同謀，誘

賣其夫羞忿自盡天故前殛之也無錫縣境某姓染坊歇閉後有某甲携重貲來替是業坊主他出學徒某窺其資置毒於飯以食甲甫下箸巨猫躍出撲噬飯碗於地少頃雷電大作暴風旋刮雙扉洞開僕趨立戶檻方將閉門霹靂自頂而下擊斃戶外甲莫知所措視所傾飯顏色盡變始知徒遭殛之故云此庚辰四月十九日事也姑蘇胥門內某姓翁鰥居無子止一女年及笄受壻家聘幣悉納女閨中未信宿失禮物二事皆命飾也翁以女室無穿窬蹤疑女有外私盛詰未已繼以扑責女羞忿莫辨伺隙欲自縊風雨並至雷電交加同室某媪自室中趨跪庭心手持金飾自云金由我竊原物尚存願交還勿枉死人若有迫之言者媪亦如夢初覺云鎮海鄉稻樹地方某姓老媪以事進城隣右以衣囑使典質得青蚨千餘枚偶失檢質票與錢被竊去哀號乞典中乃得重寫失票半給錢文既歸家人交謫隣人諷刻羞忿無以明竟懸梁

馮大日城中有一傘匠於洋烟館吸烟忽雷電交作聞之戰慄即以撞騙情事告人甫出門窸然一聲已擊斃矣天津唐官屯一小村落也有某甲者其日機鄰雞之癖鄰有女方垂髻待字閨中時以失雞爲恨甲中年甫得一男作湯餅會殺雞爲黍以宴賓客毛羽棄諸門外女見而異之潛入窺探釜中之氣蓬勃上蒸揭其蓋雙雞也時甲婦他適小兒嬾啼女忿火中燒惡念頓起遂置兒於釜而歸婦覓兒不得觀釜蓋有異啓視則兒已糜爛矣婦驚魂欲絕痛子亡懼夫責倒撞水缸以死甲歸見子死婦亡亦投繯焉不半月雷雨大作女被殛死人有知其事者僉謂女忍毒甚故有此誅云嗚呼是皆情真罪當也天威咫尺昭昭不爽其毒害已成者固不待言卽或有毒害未成而誅心之法不從末減是陰律之甚嚴也至於以睚眦小怨斃以全家則又理所難容者然則世之人亦何苦以身嘗試哉

又有被殛之人而究不知罪業者如寧波西鄉於己卯七月間風雨交作電掣雷轟有甲乙兩農素謹愿一披箴戴笠出視田隴至碧水觀霹靂一震甲竟擊斃頭有一孔大如盃口直達心窩腸已流出乙亦仆於旁少頃卽甦觀主扶救之乙云膽已驚碎救已無益遂投水自盡云滬城南市有陳姓者年二十餘一晚在家寢息閨房燕婉方極其樂霹靂忽驚震死於衾窩中皮肉俱腐臭穢遠聞妻亦於聞雷後驚魂失措半餉方甦陳素純謹忠厚不知其作何孽爾俗云雷擊三世幻妄之言也之三人者豈果有前孽歟抑將當其雷出之地而誤遭此劫歟而要其必有隱慝故至此耳天豈夢夢哉

鬼怪傷人必受天誅稗史傳錄不一近亦有與此相仿者某歲夏間滬城廣福寺側有浮屠女棺一具閱時三載雷火忽加擊破其棺屍女容色如生肢體亦未朽腐惟胸腹被擊洞穿俗所謂僵屍者近是寧波東

湖有史殿撰墓築於順治年間墓道中舊有石鳳蟲一物碑已斷去鳳蟲失所時有崇人事受其迷惘者因之斃命村人欲除其患卒無計某日雷電交作鳳蟲粉碎其怪遂絕捍患除災此天之所以衛人也天心卽人心其信然哉

物之大而毒者雷亦必以時殛之爲除害也庚辰夏四月十九日蘇城大雨震電某姓鋪中有老樹一株電光閃爍樹頂忽有火燄爆烈於火中見一巨蛇大逾尋常昂首蜿蜒繞樹周匝旋霹靂一震蛇已杳然火亦頓息矣是歲七月間江西章江門外三聖廟檐下震斃蜈蚣一尾時則大雨傾盆電光閃閃轟擊半時許方斃按蜈蚣長三尺寬八寸有奇背上班駁成文腹統白項下有紅絲數縷似是巽卦或謂卽雷所書者當其擊也有在船中遠觀者方雷聲殷殷卽有濃雲下罩繼有白燄自瓦縫衝出蓬蓬如釜上氣雲卽收上數尺如是者數次晦暝益甚陡見

火光一道旋繞其上雷遂擊下不半刻遂霽辛巳五月鄂省武昌縣狼子湖向有漁舟設網一日雷雨急至各收泊港內俄而雲霧中攫拿一物彷彿若龍衆皆伏而觀之霹靂一聲物落下雨止通視則一大鱧魚也背青色長丈餘觀者紛至各鬻割烹食亦無他異云噫是皆非常之怪也必有以傷乎人而干天譴者或則恐其物之大而毒而先爲殄滅者物過盛則當殺其是之謂與

樹木受風霜雨露之精積久固可爲妖或亦爲他物所憑故老樹婆娑千百年之物或受雷殛見之者屢矣且並有架梁柱木亦遭雷火則真不可知也揚江西門外有司徒廟一所據言建自南宋朝廟外大槐一株高十數丈陰覆數畝歲豐固土匪肆擾砍伐西鄉坎樹及此株一斧甫下鮮血迸射各驚散去已十月某夜大雨震電火光四照樹腰劈開三丈許餘則無他異也又東關外陸家莊陸某性淡雅喜花竹小有苑

面草堂下有已枯銀杏一株久不青矣其根下有凌霄花二株牽附於上綠葉垂陰紫雲布帳觀者不見其爲枯樹也陸甚愛之辛巳六月晦日午後小雨初過急雷忽響枯樹劈分爲三後細視其中無別物惟劈處血痕一條約八尺許根之左三尺外地穴一孔深有五尺穿至地偏而起不知何由己卯八月杭城湧金門內某麪館瓦舍數椽一日午後暴雨急雷擊去屋脊椽木三根色焦黑木亦碎裂中一椽擊穿一穴約盃許大兩面洞穿可貫以繩當轟擊之時亦無他異云漢皋隄外萬家園積年義塚也土墳三尺橫比雲連地後近湖幾與魚鱉爲伍善堂旣築上岸圍墻後造屋倩人管理並禁牛馬踐踏青燐白骨稍安黃壤屋前舊設冥燈一盞高約數丈每晚燃火以照及戊寅四月初夜大雷電燈杆爲霹靂震斷餘並無異物或謂木之雙心者皆遭雷火或又謂電氣之火觸燈而發故木爲震斷此皆人臆度之詞耳天道冥冥固非一



知半解者所能妄測若必以膠固之見解之謬矣

雷殛一事所以懲隱惡也至於暴殄天物龍華西南有蔣姓生一女者嫁同里阮某爲妻性極和平戚黨咸賢之惟潔癖特甚每以粥湯漿洗衣服人或勸之卒不改某歲六月間又以粥湯漿裹衣襲時雷電交作女已震死矣

陰晴原氣化之常然當佳節欣逢零雨其客亦殊敗人清興况歲首人日尤須天朗氣清惠風和暢乎友有人日新晴小記曰處處懸牛畫虎乍過元辰家家貼燕粘雞又逢人日憶玉壺之碣雪梅蕊添肥更銀蕩之蒸雲藥苗濟滑乃令節剛逢飲爵而長空忽喜懸鉦椒室紅疏共愛融融麗景草堂活暗生冉冉芳塵平添明媚之陽光杜老莫嫌花緩微度暄妍之淑景魏家好作山銘護城踏迹而增歡荆俗踏灰而送煖時當日午薄有雲陰然已翦綠人閒傳盃客醉看此際望仙樓敞依然

軟繡街新待他時不夜城開還共踏歌遊去噫是亦并平樂事也然非  
兵革不驚閒身尋樂亦何能與會鸞舉哉詞采風流才入小品於此可  
見一斑也

燥濕爲天地自然之氣月暈而風礎潤而雨人以此測於幾先者固古  
今一致矣近自西法盛行所謂陰晴表者殆非一物有所謂沙漏者以  
玻璃爲之長約尺許圓如大竹筒圖無孔中空其中有沙焉豎直視  
之晴則沙皆自升而上雨則沙墜而下驗之歷歷不爽此殆仿葭管吹  
灰之義而爲之者也此外又有二式規模各異其一長者五六寸寬約  
二寸如小匣面嵌玻璃中有一玻璃細管中空而下圓如龍眼大內貯  
水銀晴則水銀由細管漸進而雨則由細管漸退而下若驟退而下者  
必主大風其一則圖式輕尺許內如鐘表之面有針盤旋針之所指視  
其字焉指晴則晴指雨爲雨指風爲風指霽爲霽亦無差忒按此三器

皆爲航海要物各有妙用而人心之巧則一也殆亦精於格致之學也歟

史言地震者不一大率地氣空虛流走激盪耳亦有因之成災者己卯四月十四日金陵忽爾地震屋瓦窓格及懸挂玻璃燈均琤琮有聲片刻卽止十八日午後復震與前彷彿此猶小焉者耳日本於是歲十二月地震始從東北而至西北少停又震從北而南聲勢甚重歷二十杪始止洋房各柱俱動屋瓦俱有裂聲棟折樓崩不一而足西房巡捕房屋中人均受坍塌之傷甚異事也雖曰地之升沈於此可見要其所以震動也究不可理解矣參氣化者富有說以處此

天生勝境必有天地間偉人居之方足稱人傑地靈如西湖爲杭州絕景三潭印月實爲十景之冠風亭水榭碧檻紅廊環以藕池通以略約爲消夏第一佳處兵燹旣平湘鄉蔣公任方伯重爲脩葺一仿前式宏

整勝昔其地之東由小橋迤邐而入則爲退省庵乃彭公雪琴之別墅每歲於巡江閱武之暇小住月餘蓋曾奏乞爲養病所如賀季真之鑑湖一曲也時有德清俞蔭甫先生以名翰林督學河南後遂主詒經經舍教肄業者釀金於講舍東創一俞樓以爲公夾省憇息之地於是先生來杭無不置榻其中背水面以全湖在目足占一湖之勝矣某歲先生至適彭公方在退省庵靜養互相造訪談欵極洽兩地相去只一蘇隄之隔駕輕車理短棹往返捷便當時覽之者皆謂文昌武昌曲隔水相望真如南北兩峯並峙矣地以人重人以地彰何相巧之若此哉天下事無獨有偶蓋於此二公信之

湖山幽境風月遨遊實曠人逸客之常事乃亦有因而釀禍者非所謂樂極生悲者歟姑蘇石湖相傳爲范大成別墅歲逢八月十八日吳人皆買舟遊湖謂之串月先於十七日夜漁舟數百號及俗稱師娘者鱗

集水次至上方山進香此外有飛叉船打拳船於行春橋門中往來蕩  
槳十八日香舟漸杳畫舫偕來誠一時勝事也不意有航船中流覆沒  
溺水者二十六人經醫船救起死者三人遊人遂闕然散去時有人紀  
其略云吳郡石湖之上有行春橋焉一道虹腰百行雁齒下有數洞可  
通遊艦彼都人士每於中秋後三夜爲串月之戲淺浪浮棹嫩涼愁人  
銀燈與璧月交輝秋水共羅衣一色彈箏挾瑟青樓之妙伎齊來滴粉  
搓酥白石之新詞低按蕩出蘭橈桂楫於意云何傳來鬢影衣香誰能  
遣此於是墜鞭公子芳艸王孫快呼一葉之舟高燭百枝之焰但見波  
光穆穆月影沈沈珠點當心宛轉於琉璃之內金投虛牝逍遙於翡翠  
之旁重以雙槳劃波蚌疑暗剖一簫破寂魚亦潛聽不特遊客魂銷且  
令閒人色喜乃蘭氣微醺之候正葦航紛集之時厥有航船乘潮而至  
大夫夫不因人熱何須怒放心花小妮子偏唱奴嬌遂欲飽資眼福不

料勢成偏重丹覆中流巧笑何妨三千里快遊水國善泗莫必廿六人  
齊作波臣竟負雅遊不敢酒斟蟻適逢將伯幸而醬撒紅螺蓋適有  
城中送醬之舟全水內衆生之命然而三人成衆靈魂已赴重泉百喙  
何辭韻事翻成禍水於是羣呼無渡共賦言歸皓魄當頭依舊清涼世  
界遊蹤匿跡重新歌舞樓台按是紀文詞跌宕情事昭彰都人士爭傳  
誦焉噫禍兮福所倚天道之常溺死三人雖曰咎由自取要皆風流自  
賞者有以致之故君子貴慎微焉

山川靈秀奇異百出此探奇覽勝者一望而知也乃有山洞繚曲別開  
異境者則又匪夷所思矣羅姓壽村者亞墨利加洲村人也所居一室  
依山築成後通山洞一區廣約數間類密室然深藏什物於中有年矣  
嗣欲廓其所居斲開洞石視之則幽深繚闊不可以道里計循途入初  
極狹數十步始漸廣轉折數呈後得一弄唐行兩時許始竟約三十里

旁有一池清水溪洞游魚無數取視之皆無目池頗闊幾六七丈視洞屋石倒掛垂垂如春筍瑩潔清潤可愛旁多石屋高大宏敞又得古塔一下豐上銳祭台一旁且有古墓棺槨皆以石爲之甚堅實識者謂此洞本居人其塔其墓其祭台造作極工必猶太人所爲因置墓故封其洞古人所謂疑塚原恐啓伐耳今雖石洞堅固人就猶鑿而開之信乎奇異之境不能久秘疑塚亦何爲乎哉

冬日飲湯夏日飲水人皆遵而行之然亦祇取其煖與涼耳於理氣一事茫如也西人春飲荷蘭水及同類甜水有某者曾一飲之胸膈中頓有清氣勃勃探喉而出詰之則水中實納有生氣所謂卡朋氣者故奏效甚神也聞英國昔日製成此水運售他國獲貲甚鉅近亦取值甚廉蓋仿而爲之者衆也考其製水之法機器右有一鉛櫃先以強水化大理石取其石中之卡朋氣或他物中之有卡朋氣者閉氣入櫃由櫃將

氣激入堅寶銅櫃一人以手搖鈴卽有一極動之物旋轉迅疾莫與比  
倫使氣與水調和爲一儲之於瓶水遂以成爲寶其微效益甚大人亦  
樂得而飲之矣而所以取氣之妙則格致家自領之可耳

災異之事不必懸象著明常聲起空際有曰城隍究難臆決己卯歲蘇  
郡於冬月十八日清晨有聲起於西南天際始則隱隱如雷繼乃隆隆  
如磨旌乃如數十里外連珠鎗炮轟擊者逾時始寂聞晉兩門居民靡  
不聽聞丙子五月十七日蘇城風雨淋漓晉門一帶突聞有聲起於城  
頭似雷非雷似炮非炮閱一時許方息己卯閏三月十二日聞晉兩門  
又有城隍之說信者半疑者亦半不料於二十二日其聲復作初以陰  
雨疑雷繼如車轂往來轟轟不絕半時始止又戊寅歲五月十二日無  
錫城廂內外聞有聲起於城頭城廂內外無不聞之牆陰僻徑間輒生  
白毛長不逾三寸細若銀髻童子游戲探拔隨手卽是不逾時竟可成



把或者謂地生白毛此旱象也蘇城於此月十六日有火光一道大若車輪自東而西如星之隕如電之掣霍霍有聲闐門外居民悉見之或又謂此火殃也然則墜落之處其或有大火乎陰陽之理杳茫難覺吉凶所在亦無後驗存之以爲他日之証

人臣効忠之地必曰能致其身所謂致者非曰殉節也然至於戎馬倥偬大勢已烈隻手難撐不得不以一死報國家諸葛云鞠躬盡瘁死而後已卽此意也而其情則慘矣雲間逸史有陳張忠懿公死事記甚詳且盡可以見當日之死實有爲人擠迫者爰錄其詞曰宋史載韓岳扼金人於險地於危無可遁之時有秀士叩馬而諫曰國有奸宄擅權於內未有大將能立功於外者也有哉斯言我朝道光咸豐間一則西人犯吳淞口一則粵逆陷金陵城陳張兩公之所以失守致垂成之偉績墮於一朝兵潰敵竄乃以一死報國不禁歎秀士之言確有明徵古

今人同此恨也按陳忠愍公諱化成籍隸閩垣由行伍起家緝捕洋盜屢建奇勳洊擢提督道光二十年調任江南不逾月滬上有西兵之亂親帥部兵防堵吳淞與士卒同甘苦攘臂一呼應如雲集以其得將士心深也先是吳淞口南北兩岸南係公自將北爲牛制軍檄令太湖水師鎮守公以其師多怯弱力阻之不從五月八日謀人來告云西人船勢將直逼公乃登炮台持遠鏡窺探知敵船將至飭弁將巨砲裝彈藥以待之無何遙見黑霧漫天奔騰漸近開砲轟擊不絕恐彈藥不繼赴演武廳牛制軍處接領詎意制軍不發且傳諭速退公恐亂軍心仍令盡力攻敵敵人亦有退意或教其將長鈇裝入銅砲向演武廳施擊牛制軍正屬目探視忽當空如火龍翔至驚慌無措卽乘肩輿而逸公見制軍已遁回顧北岸太湖兵亦散去西船傍北岸駛入公知勢不可爲遂具衣向北叩拜曰臣力竭矣遂服毒自盡裨將劉國標負其屍匿塘

下蘆葦中是役也使北岸有勇敢之兵主帥無畏避之舉彈藥不匱應接無虧西船未必能逞志乃矯矯虎臣竟至束手無策是誰之咎歟厥後十餘年髮逆猖獗盤踞金陵總帥向督兵規復累年不下張忠愍公國梁於行陣間屢立奇功總帥薨即以張忠愍公繼之功日隆爵日晉而忌之者日多時和帥督辦軍務公擁重兵數萬分道進勦餉糈告匱迭催接濟和帥忌之按而不發兵心離散公以大勢將潰屢請於和仍不發不得已商於何制軍何亦置之度外適浙省有警羽書迭至請濟師制軍又遣公之前鋒張玉良分兵前往其時餉缺兵變危在旦夕復恐叛兵勾通髮逆潰圍而出求制軍調回玉良相爲控制何又不許事遂掣肘不數日兵潰大隊衝出勢不能遏公遂死之惜哉二者相提並論則陳張兩公之捐軀殉難均有所迫而然也陳誤於牛制軍之怯敵張誤於和帥之匿餉又誤於何制軍之疏防罪案昭彰國典已分別懲

治備兩公嗣續雖邀旌卹之典未蒙破格之恩善人有後况忠烈乎余先後目擊其事因備詳之功罪昭然自有公論亦毋庸贅言也

蓮峯陳忠愍公以身殉難大節昭然人皆仰之至一身瑣屑事則靡有記憶者滬上無名氏有公軼事記見公之英勇固異尋常萬萬矣按公爲江南提督時愛民禮士撫循營卒道光壬寅歲築敵壘禦敵吳淞口旋以失利戰亡部下武進上某匿其屍事平成殮面目如生此其忠烈之氣固足以炳寰區塞宇宙矣當其守吳淞也檄鎮將某分駐西礮臺以示固守其部卒有盜民雞者民訴諸公公飭鎮將率所部卒至將以狗哀求乞免乃減等以軍棍插箭遊營以示戒會謠言敵至吳淞羽書告警公與制軍某公約海口軍事一以付余君但無出寶山縣城一步併力和擊蔑不濟矣未幾敵入口公儘力轟擊戰將捷矣制軍乃棄寶山而遁西礮臺守將營前隙反炮擊公中項而卒吁可惜也此記與前

說稍異蓋當其死事之日戎馬倉皇傳聞異詞故記之者疑以傳疑耳要之皆殉節也而千古不朽矣

古來戰無不勝攻無不克端賴吾能用兵之將求之於今邈不可得必有胆力過人忠勤邁衆者而始稱爲名將焉軍門蔡公某庶幾乎蔡公統兵多載粵逆之亂轉戰數省豐功偉烈中外咸知其將將馭兵悉用西法而進戰退守悉合機宜曾有某名下士爲作紀功頌其中如有勞必先無功不首禦侮則衝鋒折銳遇敵則斬將奪旗勦北整南刃皆飲血綏近略遠夜嘗枕戈而且紀律嚴明秋毫無犯震疊則風雲變色披靡而山嶽崩頽望大樹之婆娑寶長城之保障等云蓋皆實德可紀非徒效諛詞媚頌禱也詩云赳赳武夫公侯于城微軍門其誰與歸有名將之功而又有名儒之德者稽古以來兼之者亦有其人而究不易得矣近世彭官保殆仿佛似之官保巡閱長江水師歲駐西湖數閱

月兵政之暇民生疾苦時專利病無不備訪周諮下詢芻蕘利則興之病則革之食福者不知凡幾而宮保素性廉節飲食服御一從儉約雖膺華臚猶寒素焉當其初出都也會奉各直省督撫措資以備緩急之諭浙撫楊公因具金萬二千宮保納焉而專摺繳呈其摺中有云臣以寒士始願以寒士終至哉言乎真有古純臣之風矣宮保少時卽英歧頭角崢嶸方應童子試武林高廬洲翰林守衡陽得公卷大奇之拔置冠軍覆試時語之曰子文有奇氣今見子人亦有英氣非凡品也他日宣力王家定能作一番大事業也宮保戀恩知己故生平執弟子禮甚恭粵寇亂浙翰林旣前死子亦死家道凌替僅存寡媳孤孫宮保知之其所以周恤而教養之者無微不至每至杭寓高氏宅布袍芒屨每每獨行不知其爲欽使也食屏肉食每食則白菜一盂椒乳一器爾性嗜越中乳高氏於其行也饋以六小瓶宮保僅納其半而却其半焉宮保

又以供億之甚煩因於三潭印月之旁得隙地一弓建一退省菴以居其節操志行又非陶融於書籍者不克純化如此也天生李晟以爲社稷豈虛語哉

光緒某年江浙漕運在黑水洋遭颶風沉溺死事之員天津建立專祠永奉香火此國家族忠典也祠宇落成額其額曰勅建憫忠祠棟宇聳飛規模宏壯丹雘彰施備極絢爛祠中正室係太僕寺卿銜知府副公光烈神牌餘皆贈四卿銜道府銜者世職則統以雲騎尉世襲之祠內楹聯甚夥其尤者合肥李相國鴻章聯云大海咽波濤遺恨難慎精衛石聖朝多雨露褒忠常仿水仙祠江蘇糧道英樸聯云轉漕裕倉儲指譬方須詎壯志長埋蜃霧居然成浩劫褒忠隆廟宇奐輪伊始願眞靈來格鯨波從此靖重洋海昌陳炳泰聯云一死亦何奇諸公浩劫同淪最難堪碧海驚濤寧天慘霧千秋均不朽異日英靈如在願常護颶濤

風轉芻粟雲飛又有合肥王世藻侯官江錫圭龍泉蔡世廉同襄漕運  
在洋獲救者共擬一聯云同大劫於重洋憶生死湏臾誰料至今留我  
輩慰忠魂以廟祀縱春秋憑弔不堪痛往哭諸公數聯皆情詞正大膾  
炙人口者故備識之風濤瞬息慘作波臣俎豆千年儀隆祠廟想死事  
諸公當亦謂雖死之年猶生之日耳

先民有言詢於芻蕘誠以芻蕘之言雖鄉曲而一言之是非規政治之  
得失非淺鮮也浙西多聞散人海曲閒談一則甚有關係其略曰南沙  
隸居海曲地勢旋折南受浙水北受大江波瀾迴復激宕駭然倭人海  
寇出沒其間居民咸日夜不安自雍正四年欽公薊權縣篆始營雉堞  
繼築海塘規模粗立而政治畢昭興樂利於無窮實閭閻之厚幸由是  
海慶安瀾民歌擊壤俗敦樸利重魚鹽禮義日興人才輩出非若邇  
來之刁頑浮薄也然自分縣以來百有餘年其風俗之轉移無定皆有



司之教化有方欽公而後如韓潘陳李劉楊孫左高張馮葉陳諸公要亦恩威交濟化導遐敷無不頌萬家生佛焉而民風振振日上矣故有心世道者每至邑令調勸必爲之贈頌瞻瞻念撫我耆復有魯恭乎嘗聞父老相聚而言曰去年以夏哲人金公下車浦左民歌來暮公不時親歷各鄉詢民疾苦雖婦人暨子莫不指而目之曰此好官也與利除害不可枚舉而尤爲嚴絕者莫如賭博其他則關風化利民間無不爲也夫有司既有守土之責孰不欲力起施行而或作或輟始勤終怠經營求治半屬虛文固有利未起而弊卽隨之矣金公則措置得宜終始無間推原其故實由舉錯得人耳不謂盛極難繼福星不能常照公奉札調吳江民雖有攀轅之願公竟將沃槽而行安得有克繼前猷者一紓杞人之憂也新令顧公聞亦老成練達政治不知何若第目前舊尹將行新官甫蒞賭博之徒乘機竊發倘新官仿照前規吾恐若輩有噬

濟之悔矣有心世道者不禁拭目俟之此固父老閒言耳是非之公賢否分焉官斯土者其果何以副斯民之望乎而老年更事之見要不可沒已

將才固難而求爲名將之才則尤難名將蓋非徒以勇敢著也胸羅武庫學具韜鈴運籌帷幄之中決勝千里之外勦猷彪炳威望宏敷非天生偉人其曷以當之乃觀於張公朗齋而有合焉公名曜浙人也由牧令起家洊擢至豫藩向在豫省征勦卓著首勦左爵相檄調出關疊克堅城遂乃游辦新疆善後事宜井井有條百廢具舉上下數千里聞軍門威名者率戰兢股慄俄人回黨畏之特甚軍門於粵逆初平之際回杭里居日與鄉父老閒話恂恂有儒者氣象杭人相傳爲宋時張保後身此固無稽之言無足取信也近日杭垣來安橋河下重脩岳廟客有入而瞻眺者見神座前有廉訪刺士猶禮聯並跋語讀之不禁矍然夫

蒯公碩德者年官居風憲必不肯作妄語况形諸筆墨而懸諸神明之側乎其聯日光汝荷神庥七十日固守巖疆幾經戎馬關河馳驅電掃溯自賢豪夢錫保衛中原臣節懷春秋亘古丹心昭日月湖山新廟貌數千里蕩平巨寇共賴精忠偉烈浪靜烽銷迄今舊址重尋敬瞻遺像宋宮埋艸露獨留正氣滿乾坤其跋曰謹按忠武記王志在春秋服膺聖帝始終得懷純臣之節憶自咸豐歲閒蓀丁外艱奉命墨經赴光州任時淮氛方熾過湯陰及朱仙鎮謁王祠夜夢王延入旁坐者爲張桓侯王指謂蓀曰汝內姪張曜乃桓侯後身昇以助汝追賊圍固始七十餘日力戰解圍曜有力焉嗣後在豫二十年轉戰數千里皆曜爲先鋒信陽劇賊望風盡降生全者二十餘萬凡曜所過都邑皆王所當年力爭中原之地王之靈爽實式憑之矣謹誌遭遇之奇俾志在生民克奏膚功者皆神賜也觀此則公爲桓侯後身所謂張保者特訛以傳訛耳

公度識宏闊器宇非凡馭事嚴厲明察而體恤亦無微不至故屬下俾靡不畏威相向詩文詞推作手有河聲山色樓並窻夏弼廡等記泐之貞珉百代不朽書法亦蒼勁異倫左爵相刻章謂其字仿平原洵有其實也其書幅中有自作云吏治才疏復治兵中年事業兩無成羸來閱塵添香味常處艱危識世情痲體漸知愁塞月塵顏已改尙邊城書生莫道封侯易還向文章博令名一生心跡已可概見有八詠生爲公隸併員每親矚臨池揮翰時隨興發詠不稍機滯故所作詩句多天成也總之天生鉅公前身原自來歷耳豈庸庸碌碌之夫微時倖獲濫叨爵秩者所可冀哉公嗣孫嘯驥統軍年十三卽振立其英果超羣亦後起之俊傑也明德之後必有達人宜哉

古詩云廉吏而可爲而不可爲此激詞也亦謂孤標一世囊空如洗然要其清白留遺則固享美名於不朽矣何公鐵生以名翰林出守揚州

政治寬厚愛民如子除奸詰暴興利革弊固無不爲而尤能體恤下情使人歌泣其嘖嘖人口者數專暖閣紅幔爲偷兒竊例貢大堂役賠償役既貧且畏罪不得已將八歲女孩售去得資以償公聞之意良不忍乃促返其女而慢則署內重製不令償矣役泣謝而去又一日乘車自外返甫至東轅門有鄉民奮身攀輿號泣用力迫猛車幾傾側太守溫語詢之則以賣皂角得青蚨千餘因官到匆忙避道遂被竊去此錢一失他無餘本老母七十外行將填溝壑矣太守憫其情急非僞立命值役地保查追地保無如何集資繳呈民乃稽首感涕崩角而後領去當時人士頗詠歌之公素性廉潔郡有同益典被回祿災城鄉受累者洵洵投訴典主議扣利償本公乃曉以利害命照例按稟賠償毋許扣利壁立千仞不受苞苴遂使窮民皆破涕爲笑守揚十六閱月一錢不名原籍江夏亦無居址自通籍以迄出守新舊遺負約三萬金食指衆多

瞻畜非易太守泊如也居恆有解嘲詩云有臺焉用避無磬復何懸之句可想其心胸闊達矣太守年屆初度其長公子以孝廉得知縣銓發安徽携眷屬來揚祝壽不謂公子亦負債者太守始見眷屬喜甚繼見諸債戶又大驚謂公子云若輩隨爾之任兵不由將勢必狼狽爲奸則地方奚罪焉辛己歲六月忽得疾言與前任英公式梁絮語移時殆將不久於人世矣並言前生作官六世其一世十七歲得鼎元乞假歸娶卒於途云云身後事一一諄囑概從儉約彌留前一日力疾伏几作書上洪都轉書畢便仰臥不語有人竊視其書則云某貧困一生身多逋欠然有子可以終償今已告別所切懇者不開弔治喪不打商人秋風某商雖我門生並無師弟淵源如以杪木見贈宜切却之雖柳桐薄棺亦所心安所幸公項並無虧挪如能使孤兒率婦扶櫬回籍足矣都轉得信急至時已易簣方易簣前時猶執長公子手訓之曰做好官不要

錢祇此六字別無他語人之將死其言也善可想其廉潔矣且有自挽  
聯云伏枕臣心愧官守騎箕屬鬼掃攬槍公於平日因國步艱難每爲  
切齒心不忘國也又自署一顏云何以家爲公作宦雖久無一立錫地  
心不忘家也事業未竟遺恨何如乃於月之初五日戌刻溘然矣斯時  
也內則親丁戚友下逮童僕皆痛哭失聲且有哭暈而死者外則紳士  
商民以及貧販婦孺無不聞之下淚街巷哭幾於罷市嗚呼公之恩  
德及民可知矣聞公稟大府請奏入名宦祠千秋享祀永報馨香固揚  
之所以報公而究之公以艱危苦境守廉介之風布惠愛之德實不計  
及身後之名而後爲此也特以性誠使然故能處困而亨而怡然自得  
也嗚呼如公者天壤間何寥寥哉

守牧爲親民之官其政績卓著人歌遺愛撰聯表揚政德此固有以決  
乎閭閻之寤寐而後及此者至於以恤民勤政之意撰爲聯語勉一已

勸百姓情見乎詞雖時代已更而膾炙人口有不隨日月俱湮者故即  
耳食者誌之欽其德非徒賞其才讀其語可以想其人矣周麟松先生  
鴻於道光中葉守揚州時承平日久民物豐阜先生律已愛民口碑載  
道自撰大堂楹聯云統一年三十六旬仔細思量那件事利民爲國闢  
八屬億萬千戶通盤打算有幾家足食豐衣政績利益橫難枚舉卽此  
聯如見其心焉後同治戊辰長白吳公式梁繼守是邦兵燹之後民困  
未蘇政治一以公爲法而措施倍難癸酉歲麻宇落成重書是聯懸之  
廳事蓋以存遺蹟並自勉焉湘鄉左青時先生輝春爲高郵牧政治寬  
厚惠鮮小民以農桑爲本務以禮教挽頹風公餘之暇輒與膠庠儒士  
論道講藝一時人文蔚起固不獨家封戶足也署中有自撰數聯皆醇  
醇以愛民止訟爲心其曰百里雷封只種些潘令桃花陶公楊柳謝傳  
甘棠暑往寒來榮悴也都關我輩一州斗大此間有秦郎國士莘老狀



頭朱卿孝子風移俗易方隅原不圍吾民則大堂樓聯也只隔這重門  
恐無術周知民隱但憑方寸地願爾曹共體吾心則五馬門聯也花落  
訟庭閒三通鼓罷直成文告簡一曲琴調則大堂後屏門聯也光緒庚  
辰歲麻宇重新屏門五馬門樓聯尙仍其舊大堂之聯板既朽當事者  
不復鍍亦憾事也幸學士文人傳誦在口尙未卽於湮沒耳同治末年  
丹徒令何公紹章浙江人旣通籍筮仕姑蘇權丹徒兼邑瀕大江民悍  
多盜蒞任二載迄無命盜重案癸酉歲蘇省亢旱丹邑獨時沛甘霖殆  
誠心所感格與其自撰花廳樓聯云載來吳下寒梅爲與此圃補春色  
掃却庭前落葉何妨竟夕共清談恤民勤政之心盎然可見解組時父  
老攀轅商民以轍去思之情皆念念不忘云靈波宗太守湘文律已愛  
民政聲卓著當下車伊始卽自撰一聯懸於頭門云此是公門裏足莫  
干三尺法我無私關盟心常懷一條水清廉自矢於此可見其守矣武

林熊淦卿大令之格同治戊辰歲爲安宜宰其初蒞治也百廢俱興惟民多健訟雀角微嫌蠅頭細故必旬旬公庭而後已積習相沿由來已久大令思之爰撰一聯懸諸廳事云王法不容和願四民各務脩勤莫向庭前爭曲直宰官非易做有一事或存偏袒斷難屋漏對神明旣自勵並示警求治苦心惘然具見不數月邑民咸化訟遂簡焉揚州甘泉邑令徐寶旌寬猛兼施頗多治績其自撰大門聯云我如稍有偏私定不邀天咎民其各勸爾職勿輕入吾門又大堂聯教養要求實事循吏不易爲除莠安良先與閭閻平其雀鼠胥役均屬子民天良期共矢奉公守法勿使士庶視若虎狼督率勉勵意深切也安徽建德縣雲溪大令攝篆二載興利除弊惠德及民去任時留一聯懸於大堂云爲政在先勞愧藐躬兩載於茲毫無建樹教民惟禮讓斯邑三鄉以內永息讎張惓惓不已之情溢於言外宜人之謳思不忘也奉化縣某君司厘

卡差題一聯云具有經綸莫謂稅監官可曠權精會計須知委吏聖曾  
爲詞得體要可爲司權良言嗟乎是皆官箴也天下爲有司者不知凡  
幾果得盡如此數公以爲民之父母不亦蒼生之幸哉然而不易觀矣  
有心世道者所爲撫膺太息也又嘉禾沈書森觀察攝婁東篆時置文  
社撰楹聯云簿書錢穀之餘小試牛刀敢謂愛民如子弟里塾黨庠而  
外別開馬帳相期華國在文章流麗端莊名士吐囑士林頌之

作官之難莫難於州縣州縣之難莫難於聽斷壹於仁慈則懦壹於嚴  
厲則刻寓精明於渾厚而不失爲懦與刻者蓋亦甚難焉爰就耳食者  
數事錄之誠難能而可貴者也江寧捕盜局劉君鞠一盜案盜名孟二  
堅無一詞劉君一日令役備火爐以錢燒紅烙腿所謂鐵灼餅也時正  
天寒孟二身掛單衣瑟縮難堪劉乃取酒與吞並給以肴孟以酒冷不  
飲劉命煖之孟曰不必卽可以火爐熱炭置二股間以蓋加股上兩股

燒至黃油騰沸孟無難色從容與劉談海外事以示豆灼餅不足困我也劉曰我頂戴在子掌握可成全否孟曰我看汝亦是好漢願以頭顱奉贈乃以各案一一誦之孟認十三起皆血案也時有一要案詢緝劉向曰亦子所幹否孟曰決不是我等一班人然彼等均有身家父母妻子值此歲荒嗷嗷待哺我固率領以圖活耳我一人所無索掛請以抵罪保全大衆是亦仁者之所許也劉曰此亦要案子如能破當爲開罪孟大呼曰子何欺朋友若此我已認十三起血案尙能解罪乎我固謂衣冠中無好漢也劉乃置之自是江河大盜畏若神明而愛之若父母矣揚州缺口門茶肆一日營哨某吸茗而去遺有表袋一尊繫於茶棹橫闌之下隣桌某生知爲某所遺因移坐於彼候其來尋細視則一端盛洋表一端藏洋蚨十元以佩巾覆之時有卜者過就卜之曰頃刻即來但有口舌耳無何哨官至揪打店夥曰我遺失表袋一具必爾所竊

某生乃起而言曰表袋固在此我爲若看守久矣爾何性急耶哨官取之並未探囊細視卽怒曰我已少洋十元勒令設肆者賠償肆主不得已赴甘泉判斷縣主旣驗表袋畢詢某哨曰爾所失洋十元吾爲若償之乃給洋十元使自納之詎知表袋甚小盛洋十元業已滿足無可再增哨官乃恍然失笑縣主拍案怒曰爾失表袋自不小心猶復藉端誑詐心何險乎當告知爾統領處治爾又何辨某哨再四求寬縣主乃判以洋表給某以五洋給卜者以五洋給店夥而還其空囊衆皆悅服而去錢塘邑令周松仙精吏治聽斷明敏有書吏鄭某者薄有積蓄中年失偶與一酒店婦有私方爲比目之魚忽效含胎之蚌鄭願續娶嗣以婦有他遇乃絕交焉婦以腹中物多方理論鄭乃給以洋蚨百五十元並立紙據其略云某婦養給多年本擬娶爲繼室現知閨箴有玷誓與永絕給洋若干令其自度孕有兩月無論男女亦任其自主斷無異

讀云云鄭復愕某氏女爲妻鄭影離縶非夢無占忽忽九年鄧攸抱戚  
鄭忽下世妻乃以族子某爲繼酒店婦憫鄭無子頓深感舊之思乃以  
衣妝換去首簪加首麻布披身九歲之子亦復麻衣如雪至鄭靈前痛  
哭鄭妻駭甚詰之婦告以始末並云彼親生子尙在何容他族爲耶於  
是兩相醜詆聲如鼎沸是非莫定乃就縣主判斷焉周君細審得情並  
驗鄭所書紙據知兒爲鄭出並問鄭妻之子鄭妻曰此係愛繼非族子  
也周君點首微笑曰汝夫所遺產業若干鄭妻曰夫在日曾管有鄉圖  
兩里及城圖分一里餘則租房住產兩所耳周君乃曰吾爲若等分家  
鄭某死猶未遠靈爽尙在骨血尙存豈無天性之愛遂書二紙悶燃燭  
焚香令二婦拜禱摸索鄭妻所拈者城圖及住屋二分婦所拈者鄉圖  
及兩里而已周君曰吾本欲如此公斷不意卜之死者亦如此分派可  
見天理人情之至勿謂鬼神無靈也鄭妻猶曉曉不已周君曰人非父

母之喪誰肯服此凶具卽以情論亦尙有以酬之况彼九齡之子明係汝鄭家血脈乎彼有子能延宗祀汝不若渠而終出汝下者以其出身不正耳况彼之所得者遠不及汝乎乃息結去神道設教聖王不廢周君欲使婦女無疑故假此以服之噫聽斷者悉如是亦可謂公則明矣如得其情哀矜勿喜是所望於良有司耳

蒲留仙聊齋志異中胭脂一則事甚離奇判詞敏妙讀之者咸驚喜近亦有仿而爲之者浙省陳鈞堂明府以名進士出宰昭文饒有守虞文告家絃戶誦傳播一時其判龐某一詞尤嘖嘖焉龐某者邑之富人也產素封性多疑妾周姓名荷姑婢名銀銀有金生菊如者延之課子旣數月矣忽謂金與妾婢有私遂涉訟判云照得龐某控金一案研鞫數堂迄無確供中讐不可言何况事無實據縲絏非其罪肯教士也含冤本縣觀金菊如章句書生鄉村學究適子之館未及半年招我由房難

通一面縱使國風好色豈忘君子懷刑龐周氏貌尙端莊年非麗綺已  
久與龐公而偕隱何至見金夫不有躬龐某生長名閥身襲崇封到堂  
數言亦知大體決不因主賓失好自汚汚人大約別嫌明微者名門之  
家範爭妍妬寵者婦女之恒情周氏附中婦大婦之班久抱衾裯而怨  
命金生少經師人師之化惟憑夏楚以收威此豸娟娟或偶具先生之  
饋羣雌粥粥遂疑踰東家之牆龐某偏聽人言恐疏闔範嫌疑原當自  
白防閑不厭過嚴投牒公堂初非好訟今衆口雷同兩心冰炭炎涼異  
性荷菊非並蒂之花貴賤殊形金銀豈一爐之汞賓東未洽別聘名師  
婢妾無辜仍還舊主門楣善保子孫必可興昌屋漏稍虧神鬼豈能宥  
恕倘該封職專房有屬無調象馴獅之術何妨開閣放姬爾童生就館  
不終遇瓜田李下之嫌當益守身如玉判後遠近皆傳誦焉又有福州  
曹司馬晉堦浙之嘉興人也素有循聲其判林振敏一案詞亦可誦林



本貧妻子生女名願貴林妻患病之乳哺隣婦李伊娥抱歸撫育後日  
婚配林李會育嗣以伊娥貧甚欠娼婦張端金錢遂以願貴償負願貴  
既入樊籠苦不得脫時有尤本爐者以告振敏謀贖無資楊孝廉景星  
者與從弟某樂善爲懷振敏往懇之孝廉素慷慨贖女選壻一一任之  
邑有王生勉曾貧士也年弱冠未授室於是媒定身價秦關之數贖有  
期矣詎張之舊識唐孝廉謀將願貴藏匿轉以景星爲地棍並串出朱  
松根爲救父捏告林敏將女沈溺渠救起及鄭成亮無媒冒婚等情司  
馬鞫得實乃出一天作之合題令王與鄭當堂作文鄭固銀工目不識  
丁王則下筆春蠶一揮而就司馬憐其才憫其貧卽着景星等出資贖  
願貴與王勉曾當堂成親朱松根及鄭成亮皆薄責焉其判曰王勉曾  
年逾弱冠未銜合禮之盜林願貴身陷泥污尙是無瑕之玉楊孝廉公  
同集聘本分府權且爲媒天假良緣人成美事惟是朱松根捏稱救父

事出無稽李伊娥妄醫嬌娃情猶可想張端金既爲鴟母應還合浦之  
珍林振敏本是嚴親可償秦關之價唐舉人助娼匿女有玷聲名鄭銀  
匠無媒冒婚實堪痛恨名姑隱匿冀改過於將來事已昭彰可不追其  
既往若尤本爐之行善殊屬可嘉至張端金之造言當合薄罪借花縣  
而成花燭消曠怨而緣訂三生試文章而選文人具遵休而案勾一律  
閩中遂傳爲美談云按兩判皆跌宕風流巧不傷雅足可與聊齋後先  
媲美此又有雅人深致而非俗吏之所能者矣豈僅擅聽斷之才已乎  
忠義之事千古並稱但以忠事主名震寰區童孺婦子無不知之至於  
義士或慷慨鄉曲或砥厲愚賤其湮沒而不彰不知凡幾矣有某言四  
義士事因詳述焉按四義士者浙醫生僕某新安客某又里民某也  
名氏皆無可攷相傳國初時盜發白蜆湖當事內大臣檄地方有司縛  
盜以獻過期不得於法當屠事既急鎮人洵懼四人挺身而出事解一

鎮免屠而盜轉匿他所四人竟代盜伏法某述至此慷慨言曰吾貞豐  
爲元和吳江牙錯地四面環湖文巡武汎屹爲要津乃復加設潞南水  
師於此盜竊益無所發居民數百家由是長子孫世世相保不輕去其  
鄉非時所謂樂土者耶嗚呼吾貞豐實受四義士之賜以有今日而掌  
故荒墜里之人幾相與忘之矣余曰夫以一盜而至煩大索意其人必  
陳忠裕吳節愍之流當時文網嚴密載筆者罔有所避然則此四義士  
者豈非激於忠義而然者哉四義士本末載章鳳龍擬乘中嘗有詩甲  
之而其文頗蕪故不錄云

世之以義成名者多矣其卓然於僕媼中而能以義傳者則固人之所  
難能者也爰於耳所聞目所有見者備識之有皖省鳳陽人老盧者家  
貧食力咸豐初屢役於司貯播瀾某傭值有餘以周貧乏愛聞忠孝節  
烈事俗所傳天門走雪莫成替死等戲服輟誦之主其慧爲講解已

未嘗違犯淮北東告之曰天下雖廣即邑發人為兵以于才幹効力  
揚取功名如拾芥耳何戀此青衣為盧曰雖然平日食其祿危而棄之  
非仁者吾不取也亡何盱城陷主與盧皆遇賊欲虜主去盧長跼哀求  
願以身代不許尾行三四里知賊兇悍無可挽回不得已伴主人眷屬  
避亂安宜途中扞衛不懈既抵安宜日食不敷知主厥有厲汜水者爰  
往告貸時盧之腹有瘡大如碗流血不止而健走如飛不知痛苦蓋其  
心急主事也因是遂卒主家感其義歲時薦杯勺焉某二尹皖人以佐  
貳候缺江西有一僕周姓川省人也某既卸署缺僑寓省中隨班聽鼓  
久不得缺拮据日甚周以別尋門徑得主而專囊頰充盈一日以事入  
省訪舊主憫其窘乏遂慨然取白金三十兩以贈不忘故主當時人僉  
以義奴名之云己卯九月候補府某太守偕一僕由滬附輪船至鎮洋  
上岸時太守失足僕見主人命在須臾急投江以救不諳水性亦隨巨

浪飄泊紅船往下游救之僕幸無恙太守屍身已浮氣奄絕矣僕誓不  
獨生復欲投水旁觀人力爲勸阻始已十月中海寧候補同知陳光藻  
者偕僕殷保於鎮江登薨船待附赴漢輪船陳忽發瘋疾自投於江僕  
奮不顧身亦投江殉主薨船人急撈救之先得幸未殞越半時許始  
得其主之屍次日收斂人謂斯二僕者於洪濤巨浪中能獲主屍皆忠  
義之心所感格云泰州張筱室明經家有僕名莊訖金者甘泉縣人服  
役多年竭盡心力明經深倚任之明經病篤莊禱神貸壽復割股調藥  
以進迄無效屬纊時莊慟暈幾絕聞者義之里人朱坡翁著義僕行一  
篇以表揚之藥口鎮金某者傭工於蘇城某姓庚申之難某倉皇避全  
家資皇寄焉某夫婦相繼亡某之子被擄餘一妾衣食於金難既平妾  
返蘇索寄物金少與之妾索全璧金曰非訖沒也聞小主在隴西  
必訪得之他日當完蒲耳金奔馳隴西閱年許始得小主偕歸妾所志

以資重繳焉主欲折其半以酬金曰是所以報主人非博賞也不受而去無錫張五者蘇城某家舊僕也年五旬忠厚樸實數十年無一誤庚申三月回家省視時紅巾賊陷蘇城主家避難於鄉張蹈百餘里刀兵之險間關尋至既歎主母年高東君年幼而又資財罄盡思報幼主以歸分主母力又以地遠匪擾不果嗚咽而去嗣遂杳無音耗不知存亡矣婁江虎侯氏聞其義作詩誌之曰義哉此僕矢精忠白髮猶存壯士風不惜一身尋舊主風波百里視如空相遇猶憐相見遲低徊不盡意如絲秋霜兩鬢何堪認淚洒西風日落時心愁弱主困兵氛欲望家鄉悵白雲徒有是心無是力惟將兩淚報東君無何作計欲南行爲有山妻難負盟臨別殷勤重寄語時清卽欲到婁城嗚呼一去杳無音動我愁思直到今未卜爾身生與死秋風盼斷寄書禽一時咸傳誦之然此皆鬚眉男子則猶易爲者耳若身爲婦女而錚錚亦以義名者蓋尤難

矣山左程氏遊幕蘇省畜一婢遣嫁農人葉姓庚申之難程挈家避於葉囊橐悉寄焉不數年程氏相繼歿餘襁褓子名鈺婢乳養之以所生子爲伯仲程亦以婢爲母及長婢夫旣死乃爲程子聘女於隣村富家旣合卺婢出拜程夫婦程大驚婢乃向衆言曰予非新郎之母乃程氏之婢也主人不幸流離凋喪郎官尙在襁褓十數年越分之由蓋誠恐良人之有畛域而郎官之鮮瓜葛也今悉以資財付郎以此易田自食其力子孫之基也程泫然流涕欲刮其半爲壽堅却之程仍以母稱使其妻事如姑焉安宜劉封君家女僕平氏者儀徵人適王姓鮮子夫遠出不返甘貧力節百變不移備封君家成豐丁己歲女主馬孺人沒遺子四長者僅十二歲餘皆孩提襁褓單氏竭力鞠養會封君家道中落奔走於門下者皆皇皇求去氏獨傾囊濟急勞怨不辭無悔意亦無德色撫視多年諸子皆成立舉室感其情留養終身年八旬健壯猶昔辛

己首夏少主却生昆季稱觴爲祝生辰蓋所以酬其辛勞也丹徒郡君  
慰農嘉其義作傳以紀之於是氏之義始大著云寧波某姓婦傭於郡  
中王姓有年矣性慷慨竭誠報主一日以事歸於途聞涼亭小憩忽見  
牆角遺一衣包內裹洋蚨二枚青蚨千枚拾之將行忽自念身爲僕役  
取不義財天更不容因坐待之少頃一少婦倉皇號泣至謂夫病垂危  
以衣典錢供藥餌費今失去我夫婦同赴冥途矣某婦以數符付還少  
婦感激分資以酬婦不受而去嗟夫僕之與臣同一義也慨自烽烟告  
警見危授命而盡力王事者有幾人哉乃以青衣僕媼上與士大夫爭  
烈倉卒患難之際或則捨身救主或則竭蹶維持榮悴如一生死不移  
古今來至性過情慷慨發類如是耳若夫安命不貪臨財不苟則亦  
皆見義之明也嗚呼豈易言哉

人生百行以孝爲先而盡孝實難至於生不逮侍奉負骸歸葬亦稍剛



其志矣乃能終天抱恨孺慕不忘是天性之甚擊者也故有述會稽趙孝子事則莫不欽而敬之矣按孝子名萬全會稽人其父名應麟當明莊烈帝時爲書生貧甚以教授遊湖北久無耗時孝子甫離襁褓也既長痛父不歸日夜號泣請於母母勿許年至十九堅請之始得行七更寒暑環齊魯遍燕趙訪覓無蹤號呼於途泣盡以血孝子以不省父狀取贖書其父鄉里名負於背以行久之至山西馬邑旁皇邑中不得去有縣人張文義者聞之歎曰豈爲趙君兒乎急視贖良契乃促孝子歸告曰翁昔亡自兵中無所寄食爾歸我嘗爲主我哀其旅死而柳封之手樹之柳亦拱於原矣今得示子矣指往墓所孝子一慟幾絕啓墓有金蝶自內飛出投於孝子懷蓋誠孝所感也於是負骨步行歸葬家山舍於墓三年迨母卒亦然康熙己巳歲大官廉其事表而異之琢石旌其門當其廬墓之時朝夕哀痛作思親錄以貽後人哀痛之音不堪卒

讀思親八則則音容不覩訓誨不聞奉養不供湯藥不嘗屬纊不視含殮不備令名不揚爵秩不加也以孺慕之忱寫終天之恨讀之者無不流涕當時人間風興感歌詠甚夥金亞豹有金蝶記茲摘其中要者錄之云夫其幼慕慈幃長依家塾源源兮永親色笑栩栩乎克奉旨甘泣效丁蘭感素冠之心事寒生子夜廣玉溪之末章影室憶親如孤蝶之獨飛無侶篝燈詢母如秋蝶之黯然傷神泊乎浮江淮濯河洛叩函谷入蒲津涼月逼人尖風砭骨穿枯林而無色催遠夢以何依形瘦於秋哀客丁其在背衣殘似粉念藜辛其當胸所過鐵馬金戈霜父星劍迷迷花賊慘慘火蟲維蜂有針不足傷其體相蛛有網不足困其神時歷七年方達馬邑足繭百郡幸遇張生卒能辨父之骸啓父之殯發蒙莊之幼想招李譯之英靈梧楸枝青痛哭於河汾之渡棠梨月白腸斷於長平之坡爰有金蝶出自墓中是父之神亦孝之瑞奉蝶而泣御蝶而

歸昔也晉水今也稽峯思親一錄所由成焉嗟乎精術銜波杜鵑啼血  
凡一物之細微亦有生之感戀而况情道罔極事屬鮮民夕葵之願空  
懷晨葩之芳徒潔傷春駒之過隙難祝長生念么鳳其末由誰憐阿鼎  
髻鷗有背負空櫬而倉皇鳥足無枝望家山而隕涕此則精誠所結野  
蟻爲之不飛血液所存樵末因之奪色者矣童二樹亦有紀事長歌傳  
誦人口爰弗錄焉嗚呼觀孝子之心殆一片血誠纏結中心萬難自遏  
問關萬里不辭勞苦而果得負骨以歸是固天之默佑也而孝則千古  
矣

師趙孝子之爲而負骨歸者又不一其人有吳孝子者祖籍東昌府髫  
年隨母流落傭於婁城過氏宅月得辛工奉養備至母歿道梗未歸葬  
厝諸義冢庚申髮逆陷蘇郡孝子倉皇戎馬間遁回原籍時以母骨拋  
棄異鄉爲恨迨江南大定遂赴蘇尋骨跋涉風雨不畏艱辛既得骸骨

以布裹之負於背仍步履回凡過一城必繞城外謂死後入城例皆  
顯宦否則魂魄不安恐驚母故不惜途之紆也又揚城包姓失其名世  
居缺口門內咸豐間髮逆猖獗城陷母被賊擄死於滇包時尙幼避寇  
他所比冠有室終歲戚戚思親不置忽有自滇來者述其母死狀兼及  
葬所甚詳包聞而大痛卽欲奔赴雲南囊空若洗窘於措費乃徒步携  
篋行乞而前登山陟水艱險備嘗凡數閱月始至其地訪覓之得土人  
指示幸得母骨緘以布貯篋中仍丐而回里星披道路雷轉飢腸費則  
拓鉢沿門夜則棲身簷下蓋不知幾經日矣忽至一處叢山曠野蔓艸  
荒烟一望無際四無居人望夕陽兮欲墜聽羣鳥之啁啾正疑懼間遙  
見密箐中有數人探首望知爲跳梁者不轉瞬盜已至前促令舍此負  
包跪而泣曰乞人身無長物祇囊中數十青蚨耳篋中爲母骸骨係從  
滇省覓得辛苦萬分始獲至此今願負歸廣陵厝葬焉乞無奪盜愕然

曰此孝子也不可犯但隻身長往終不獲平遂相約黨從護送數程乃去比抵揚鶴骨支離肢體不能起矣親族憐其孝集貨助葬廬墓遂成是皆至性所結孝思不匱相距數千里行乞往返中逾過盜境至苦矣迄乎窀穸既成此心稍慰亦苦中之甘也謂非人之所難能者與孝爲庸行而性之所至竟有以身殉之者雖曰愚孝要其誠不可沒矣

光緒庚辰歲有友述近事二爰備識之王孝子者會稽人名佳毅字子貽入紹興府庠鄞縣教諭王杏泉第四子也孝子隨侍學署素敦孝友已卯秋廣文患暑症孝子祈禱備至願以身代竟不起孝子徒跣號痛盡禮盡哀既葬負土成壙不遺餘力母亦疾事愈謹一日語兄曰昨夜父告我母亦將盡奈何亟治壽具見母則慰藉百端背母則涕泣不止人謂常情不知孝子又瀝血疏神以身代母矣孝子待病之暇祈禱益虔仲兄由籍至喜曰母有人侍矣遂於四月五日投湖以死家人以孝

子他出不之疑次早見有白衣冠僵立月湖尙書橋下微之起乃孝子也遺書二一訣其兄一勉其幼弟皆言此行隨父地下甚樂善事老母言不及私又得其以身代死疏稿乃知孝子蓄意久矣死年二十有九生二子二女長子甫七齡耳當其將死也題字於湖亭之柱曰敝六道人歸真處迨投湖而後湖畔人間鼓吹迎神云是王孝子而是日其兄里居亦夢其弟白馬渡江前導有金牌二大書孝子悌弟自孝子之歿而母病良愈嘻異矣寧波府守宗君湘文聞之嘉歎爲作碑銘其銘曰舜江之曹兮救父與俱沈慈水之董兮事母終其身父罔救而母罹患兮嗟嗟水灣乃有道人惟孝子之就隕兮父乃死而不死母且瀕死而得生湖波湯湯兮孝子之心千載與之清湖月皎皎兮孝子之志終古與之明我爲作銘兮此石可泐不可磨者孝子之名又甘泉學書左某性至孝母不悅其妻卽以寄於岳家歲往視一二次甘旨之奉親爲治

理庚辰三月母疾劇皆謂藥誤左某以生不知醫懊恨無已既逝呼地  
搶天葬後三日竟死墓側其弟於身旁得遺書略云母死卽欲追隨因  
大事未畢故遲遲云嗚呼是皆處可以不死之地而至誠所注身命蔑  
如而又鎮定從容裕之有素固非激於一時之意氣倉卒得名者可以  
比擬豈不偉哉

又有以身殉死而得人救護者鄞縣某性至孝幼以學藝來滬上富賊  
蜂盛時父挈家避亂中途爲賊隊所衝舉家分散存沒無音有鄰人見  
其合家投水狀某以在滬得免於難而思親念切聞耗心驚陟屺站而  
興哀望鄉關而隕涕欲覓死則以親骨未歸隱忍圖存焉某幼時定婚  
同里婦家偵其在滬婚已愆朝擬送親來滬客中成禮某以合家死難  
未得遺骸雖獲餘生實不忍婚娶堅決不從又恐婦家勸之籌思無計  
投河遇救免嗚呼愚矣不孝有三無後爲大徒殉父母之難竟使宗緒

之絕一念之誤迫於輕生其幸而不死也想亦父母宗祖之靈所默爲呵護耳其哉孝之愚也

孝無間於微賤亦無間於童年其性誠所至則又有眈然異人者皖省舒城縣皮匠某年四十餘母古希外妻早故子二十餘家貧甚負擔營生甘旨必備雖途遠日必歸侍也已卯春母歿罄賣家中物備棺殯歛葬於山躬自掘坎旣已結茅伴守四圍瓜果飢則食之有親串餽以食物者辭弗受或往約下山則跪而謝曰孝期未滿不忍疏離廬墓三年旣盡孝且知禮矣若夫以耆齡而至性過人者則尤可述焉東陽王生就試於杭返舟風急沈沒於錢塘江屍爲人撈起其子名陶歲甫十二聞之輒尋路奔赴旣無資斧沿途乞食江干遍訪三日不得望江慟哭繼之以血有漁者知屍所偕往辨認果然泣守父屍無所爲計母亦至遂置棺買舟以歸又劉安邦者清淮人也年踰五旬僅一子十三齡貧



苦異常在鎮洋某客棧作廚司辛巳五月劉之友與人口角方將勸解忽然仆地不起面汗如雨棧主延醫治之醫以春瘟不治遂不立方其子哀痛呼籲隨在靈神前焚香許願取菜刀將右手小指切下血流如注又恐旁人知之將手指私藏袖內送入父口仍未獲效越四日遂斃其子槍呼萬狀痛不欲生多方防護其志始懈殯葬竟棧主送入義塾讀書焉又某縣有魯某者以疑獄被累懼禍遠遁數載絕音耗其子甫成道思親念迫子身尋親跋涉千里備極苦辛歷院歷湘竟未尋見沿途乞食凍餒堪憐而殊無懈志必尋見始返云嗚呼孝固難矣孝而出於編氓之人豈弱之子不尤天壤之所罕觀者耶不讀書者且若是讀書者更當何如耶

新興場北趙某固窳丁也以煎鹽餬口家有老母及妻一子一女境遇奇窮幾難溫飽如是者有年矣惟事母至孝順妻亦賢高堂甘旨之奉

雖拮据必備皇中僉以孝稱歲在辛巳夏秋之交通泰各屬風潮爲災  
房室毀傷人民淹斃概難數計孝子之屋適當其冲水勢驟來茫無所  
措幸有梯一具孝子卽扶母登梯上屋繼妻子比登屋而水已平機矣  
正倉皇間忽有一小艇漂來喜甚遂扶母及全家上船人甫離屋水已  
冒過屋頂然一葉扁舟在茫茫巨浪中旣難得食且恐顛覆爲患孝子  
亦無如何惟默自祈禱而已不意隨波逐流竟漂至鹽城河內上岸求  
食執途人而訴以情於是相爲震驚助米有人助費有人雖屠異地無  
嗟凍餒此真如天之福非天之啓佑曷至斯乎人皆謂孝恩所感云  
洪水爲災天之佑孝子也固能於奔濤駭浪之際而委曲保救卽祝融  
肆虐且獨能使其瓦全者如金氏兄弟是金固滬上人兄曰慎齋弟曰  
吟齋皆以孝聞老母年七旬忽遭沈疾沾滯牀席兄若弟晝夜侍側不  
離左右目不交睫衣不解帶者蓋月餘矣疾未廖兄弟並割股以進夜

半禱於北斗願以身代明日少寤自是遂痊兄若弟喜可知也後鄰人不戒忽經回祿勢甚危急咸以爲金氏灰燼矣必不免迨火滅而宅之前後皆爲焦土惟金氏巍然獨存又茸城儲孝子一事儲居茸城谷陽門外隆冬時隣不戒於火炎威方盛延及市廛正如摧枯拉朽逼近儲室遙見屋上立一金甲神手持小旂招颺火隊隨所指惟儲屋岿然僅存前後左右悉成灰燼其門緊閉時有守令彈壓令啓戶視之闕若無人惟中堂停柩一具蓋上俯伏一人詢之孝子也孝子母歿僅月餘尙未安厝當燎原之際出重貲召人移柩於外竟無應者儲知必遭火燬呼天號泣誓與俱亡遂閉門伏柩上靜待之竟無恙嗚呼孝子之情亦迫矣一念之誠遂獲九天之應雖曰孝庸行也而危亡呼吸之間足以轉禍爲福固非庸之人所可倖邀也古人有言曰天嘗與善人豈虛語

哉

孝婦王葉氏者鄂北崇陽人石林望族母教常嫻年二十餘始于歸躬操井臼琴瑟甚調家業農歲入不豐薪水多不繼翁病歿老姑在堂拮据益甚伯氏夫婦視之漠然葉氏乃極力周章姑常顧而樂曰佳兒佳婦吾將舍飴弄孫不復理家政矣未幾姑患癰疽碗口許大膿潰淋漓呻吟牀褥者年餘伯婦嫌污穢足不履老姑之闕葉氏則朝夕事奉不離左右藥餌之費擲貸俱窮一日姑痛楚劇甚幾至暈絕氏泣慰藉曰老年欲喫鮮味乞分付媳當謀以奉姑曰一嚮猪肝思之久矣奈囊空何氏曰勉圖之乃質舊布裙得錢數十枚將入市途遇一道者鬚眉已古顧謂氏曰卿行色怱怱得毋家有劇疾乎氏且泣且告道人曰猪肝非可療病必得人肝方廖氏惻然半晌語曰誠如翁言必葫蘆中貯扁雀藥耶倘憐而治之妾願棄此身以供刀匕何如乃邀道人至家視姑症而自以剃刀最鋒利者乘道人喝咒時解衣刺裏血縷縷流溢華蓋

下倒垂荷花色赤紫腎於皮膈自刳半攪擲於伯娣伯娣手戰若有懼色道人曰區區半攪尙不敷藥屑耳氏請復咒如前狀並其餘而盡刳焉神色自若適庭梧墮葉一片道人隨手拾起塗藥少許敷於氏胸血遂止而痛亦減焉氏乃囑伯娣烹熟進姑伯娣大奇異先竊嘗之則味苦於鹵不能入咽舉以奉姑姑食之則鮮似炙熊因罄一飽由是疽逐漸痊可而氏之傷亦漸愈矣邇索道人忽已潛去不知所終族人嘉其孝行較之割股尤難能而可貴邇養祠中爭以孝婦呼之嗟乎身體髮膚不敢毀傷此聖賢之學也至於愚夫愚婦一時急切迫而爲割股之事至孝所感亦人情所難能者况葉氏身爲貧家婦欲救姑疾不惜自刳其肝實爲罕聞事雖近誕理實甚平蓋孝行之尤者矣爰錄之以爲事姑者勸

又有刳肝割股救母者無論爲子爲女皆以迫切之情作此不得已之

舉有不能以身體毀傷之義律之者愚而孝也楚北羅田縣有孝子劉賢華者年二十餘父早卒母賀氏僅生孝子一人家甚貧孝子爲傭工有與飲食者必歸遺母嗣母以患病甚劇艱於醫藥聞古人有割肝救母之事時九月十九日觀音廟香火甚盛孝子私禱神前拜起數四日將夕孝子入神龕下持刀割腹廟祝驚而起趨視則腸桑桑滿地大駭窮詰之孝子泣曰爾來何耶吾其死矣衆人奔策視之孝子曰請諸君烹肝進吾母慎勿以此狀告母也衆領之越四日孝子死母病果愈又皖南靈國府葉某耕種爲業母病劇勢已垂危情迫無計禱天呼籲取菜刀至舍後空廟中持刀割胸割取肝一片回家令婦烹以供母食後卽安睡葉某取綫自縫其口以舊棉塞其口婦見形狀有異詢之亦不告越數日母病愈矣某傷處流水綫已俱潰旋亦斃命彭太守得其情分廉俸三百洋蚨生息供其母婦膳資並請旌表云又揚州大園兒鎮

汪石秋之女年甫十二歲生母顧氏早亡事繼母李氏甚孝李氏忽患吐血之病勢頗劇甚醫禱無效女悲哀三日於夜間人靜時焚香北斗呼籲通誠乃用剪刀割股肉一塊和藥煎而進母食之次日卽霍然矣噫是三事者其兩人以割肝而死皆孝心誠篤固結而後爲之然猶在鬚眉子耳至夫以十二齡女子竟能事繼母如此不尤足嘉尙者與故孝雖愚也然而難矣

孝女陳氏名巧英江寧國學生陳長生女也生有至性喜誦讀人有言忠孝事者聞輒忘倦及笄未字父業賈去家千里一日得父書病危劇欲隨母往視母曰汝一弱女子道途脩阻跋涉多艱其在家善視幼弟也可女日夜祈禱願以身代不踰月噩耗至父旣亡母亦殉矣孝女痛哭幾絕戚族勸慰女悲咽無他辭翼晨其弟呼姊不應徧覓不得留一紙於几上戚隣視之云生莫見父母之面死以報父母之恩屍浮之日

濕衣而葬光緒四年七月初五日巧英手書三十五字蓋於夜間投河  
矣既獲屍而知生衣裳縫紉編體如織知死志已早決也孝女年甫十  
九迫於大義以殉父母初不料信之訛傳迨父母同歸憫女之死爲請  
旌焉嗚呼孝女之死亦無憾矣雖曰愚孝以視醜顏苟活不能從容就  
義者何啻霄壤而臨危不苟徧體縫裳又豈倉卒輕生者可比孝女之  
愚正所以成其孝也

余嘗披昭忠錄見婦女殉難者皆慄慄有生氣有以計得脫完節而死  
者有深沈不露剝刃凶仇而死者此固智勇兼備不徒以一死畢乃事  
者若夫從容就義視生死大節如日用飲食之恒則心之靜鎮有素也  
如虞山周烈婦可紀焉烈婦湯氏名碩入歸周君小梅咸豐庚申八月  
粵逆陷常熟時小梅赴鄉賊猝至婦乃率其子女投宅中并死之同殉  
者五人臨節時屬長子於隣翁令歸其父從容作書並脫戒指一枚付



老僕報其夫其書曰妾敬啓昨君出門飯後即失常態一夜未眠今水窮山盡願君一路平安切勿以妾母子爲念今爲盡義恨不能一言永別使二工報知寄上戒指一枚見此如見妾願來生再叙未了之緣八月初三日五福街寄妾同兒女在下房井中大姐同佩官在彼房井內此字送到樓下交周小梅四相公收云云詞意婉摯詳盡慨然有烈丈夫風小梅既得書乃書其後幅餘紙云君爲我盡節我爲君守義其後由樓下徒寫白岩橋兩年遂沒恐其養子不知父母節義以遺友趙君少琴數年趙病沒又以屬邵君莫如邵得之付潢池乃遺其長子德慎永寶焉邑人王淪諫憲成聞其事上於朝旌表如例子漣澌女淑貞同荷恩恤邑之人士築菴於故址創建井亭楊詠琴太守作碑記序其事泐之貞珉汀洲賴君其勳有古風一首亦表揚之意也其詩云庚申春閩大營破江南漏地皆鋒火督師先遁大帥走將軍遺骸馬革裹

公是時賊孽復鴟張秀民潰卒皆彘強蘭陵爲墟吳爲沼虞山咫尺誰保障湏臾城陷哭聲起逆賊虐人無人理周家有婦湯碩人從容闔戶尋思死臨危誓死原不難但願妾死生者安宗祧有嗣黃口小鴛鴦無夢白首寒一片刀光殺聲震颯颯陰風催正命青山難立望夫臺碧血豈容汚賊刃祖宗血食藐孤在穉兒難女多君累不如隨妾到黃泉母子相冰亦無碍臨歧書短意纏綿爲君守義君可憐指環亦有連環義再訂來生未了緣誓完含笑顧清影一刻千秋此俄頃携兒挈女完所天長別命閨藏金井嗚呼井水不波是妾心井水不枯是妾情風清月白井邊過猶聞露濕環佩聲其他學士文人題記難具錄焉要之烈婦就義千古不朽矣夫當其烽火連郊危亡呼吸慷慨捐生與夫哀號乞命而仍不免者均之死也相逕庭矣昔紀文達論死事士卒云進一步死退一步死哀榮雖一例也從容與逼迫湏臾分爲烈婦之死非所謂進

一步哉至遺書轉輾不失想亦吉光片羽劫火難灰鬼神呵護使烈婦大義深情終不沒於人間云

凡人生爲女子身已大不幸况又遇人不淑至于銜恨以沒其志亦可哀矣如京口蔣賢婦者美而賢適同里陳姓子某初蔣與陳家固素封後則陳中落而蔣益富婦井臼躬操絕無驕傲習陳某素作綴鋪夥避亂僦居秦邦遂失業而翁姑甘旨之奉婦獨任之嫁貨既罄典值服飾或歸而貸諸母無弗與及陳翁死殯葬費皆婦經營陳某又有烟霞癖屢勸弗聽陳某欲開綴鋪向婦索貨婦又謀諸母得數百金詎意其夫得貨名則設號實則填其愁壑婦觀知之自念身爲出嫁女猶事事取給母家致兄嫂有後言夫又如是我不能負夫夫實負我終身尙何望哉遂仰阿芙蓉膏而死聞者哀而弔之三十六湖明月主長歌云郎情不薄妾命薄妾心空托郎心托先郎而死最爲佳此際此情妾斟酌妾侍

舅姑與侍夫養欲給求無事無經營家室惟僕任典買衣裳遂所圖幾  
度規耶除刺癘勿作無益害有益耶意不回妾怎知妾情如此耶應惜  
那識溫柔別有鄉有心人遇負心郎丈夫甘作烟花樂巾幗空教志氣  
強一度思量一飲泣白頭偕老今難必與其後此不相能不若自家先  
與訣吁嗟乎玉碎珠沈一夕中傷心命畢阿芙蓉我爲賢婦舒長恨恨  
未黃衫劍客逢遁莽居士一律云不怨郎情薄誰憐妾念痴短緣由數  
定長恨有誰知素志今難慰黃梁醒已運輪軒如探訪乞采入風詩滄  
海釣鰲客二絕云婦容婦德兩相富宜有梁鴻配孟光底事遇人偏不  
淑風狂雨急斷柔腸休將理數問蒼天命薄何妨自棄捐今日爲郎舍  
恨死好姻緣是惡姻緣嗚呼人非傷心之極舉頭無路乃有此不得不  
死之舉固一時之憤要亦以死格其夫耳尸陳雖曰臣道而妻之事夫  
猶之臣也婦殆仿乎此而死歟嗚呼賢矣

旌節之典國朝最尙故官紳士庶以及桑樞蓬牖無不以節義相矜要  
之湮沒不彰者多矣卽所傳聞者蓋亦寥寥平江陳氏瑞珠字琴仙善  
書法丹青兼歧黃術闔中建小百尺樓居之蓋隱以女元龜自命焉居  
恆行醫不診男子故臨門求治捧心而來者皆珊瑚輩也丰姿窈窕品  
行端淑望而驚爲神仙中人許字後思守貞不嫁媒妁屢請不得一日  
有赴診者琴仙往診乃一中年婦人按脈調和乃云無病可醫媪曰老  
身有心病家貧僅一子欲完娶屢請不遂如宗祧何千金其垂憐之淚  
隨聲下琴仙聞言梨花白面陡泛紅霞局蹐之狀媪回邀媒妁遂得涓  
吉成禮花燭後琴調瑟御閨房之樂誠有甚於畫眉者出奩資爲外子  
納粟需次浙江蓋有年矣庚申髮逆南下浙省城陷琴仙恐受虜辱遂  
與外子一帶並縊噫在天比翼在地連理雙生雙死當再結來世緣耳  
克復後以卷軸箱收其屍顏色如生蓋稟節烈氣也琴仙詩學頗精以

醫術間一作兵燹時存稿盡失惟題某安人遺像二絕人尙有記之者  
詩云玉碎珠沈劇可憐芳魂已返大羅天寫真幸有徐陵筆付與多情  
夫婿傳仁慈賢淑性天成弱質持家事倍精深惜疊花纔一現空留小  
影慰卿卿情詞蘊藉風雅宜人才德俱優以身殉國雖死猶生矣閨閣  
完人信勿替云

粵逆猖獗蘇城陷婦女死節者不勝紀極大吏採訪彙奏請旌然祇詳  
其死事或未及其生平嘉言懿行湮沒不傳亦一憾也簪筆弭彤子有  
節烈合傳發賢德表幽光殆足以補紀乘之闕矣曰秀水姚雲坡大令  
遷室朱守貞者吳下人貌美齒韶工詩善綉庚申之變大令方需次蘇  
垣筦攝軍伙局務賊既至大令謂朱曰我食祿忠事義不他過適存與  
存城亡與亡汝其速避出城自爲生計朱曰當生而生當死而死宜也  
妾在必爲君果請先死以絕君念遂出利刃自刎大令瘞其屍而出城

陷亦遇害宋沒後遺稿散失西湖淨慈寺題壁句云荀爽得得綠陰遮  
路入南屏日影斜婢子不知塵夢幻雷峯漫說鎮靈蛇余曾見及吉光  
片羽僅此留遺可慨也嘉善孫小耘司馬瑩壽室黃時貞者字靜娥亦  
吳下人性溫敏讀書識大義端居不苟言笑精女紅習椎布視羅綺蔑  
如也并白之餘輒學繪事近憚家法蘇城旣陷避居村落遇賊被害歿  
年十有六耳蘇撫以其事聞於朝得旌卹如例嗣司馬宦游雲間偶步  
蘭若飛鸞招之備述前因後果有金環金認之語亦少抑司馬哀悼之  
意也同時有桐鄉烈女馮桂姑者姿色端麗工詩善畫論斷史事具有  
特識綠窓倦綉輒喜爲韻語清新可誦著有綉窓集一卷以避亂故散  
失猶記其秋宵與姊秀娟夜話句云秋隄剪燭話團圓花影參差月影  
寒慚愧胸無半點墨殷勤阿姊付詩看庚申秋禾郡淪陷隨母居千窰  
聞賊至投河死其姊秀娟亦工翰墨適嘉興方子怡大令聞耗哀之以

其死事節略上之大吏遂蒙旌卹節略故出秀娟手書成題一絕於後  
云紛紛避寇走蒼皇弱質艱行亦自傷生不逢辰遑惜死千秋貞骨有  
餘香當時爭誦之又吳城有烈女不知何氏人居鋪由吉巷年過垂髫  
善綉工詩居平喜閱節義等書庚申城陷賊逼之鼻爲所囓痛極仆地  
衆刃之屍投於河首懸於闕明日失所在屍立水身首已合賊大駭以  
竿刺之屹然不動頸間惟一縷血痕賊懼爲厲議瘞之屍忽下沈杳不  
可跡老年賊曰殆因裸裎不欲暴衆目也遂止賊呼號三日乃死蓋貞  
烈之氣有以懾賊膽矣此數人者遇不同而志則同且皆有才而死於  
烈者也軼事遺詩彤史闕如故詳識之以代貞珉云昔人有言拾人斷  
句功不在掩骼埋骸下况其爲表賢德發幽光乎願采風聞俗者廣爲  
搜輯之耳

戎馬倉皇舍生取義固處無如何之境有不得不以烈著者亦有崩折



所天偷生不願而立志殉夫者又可哀已甘嫗者蘇之長涇人父母早  
亡依假母沈氏遂從其姓美姿容通文史閩中甘君應槐作宰來吳城  
購爲妾生一女王壯愍公由蘇藩升浙撫檄調甘君以行當粵寇告警  
遣嫗隨大婦歸未幾省城陷壯愍死甘君亦死焉嫗矢志守潔假母至  
閩逼其反欲嫁之不從發篋中書焚之賦十歎十訣詞絕句二十首遂  
飲阿芙蓉膏而死年甫二十五時同治五年十月也西脊山人作歌曲  
以紀其事亦表揚意焉天津呂某婦某氏宗族稱孝鄉黨稱賢呂歇錢  
鋪業賦閒數載且有洋烟癖氏茹苦含辛葬翁姑相夫子事事盡禮中  
耶有女年十四已字人呂染時疫竟不起身後蕭條氏屏當簪餌典鬻  
衣裙料理既畢蓋棺後評評誨女旁人竊議其事非所亟不數日氏竟  
服遺烟以殉焉距呂之死期未十日也茸城西門外王某一子已授室  
同城張氏女也琴瑟旣和倡隨極樂事上使下賢孝並稱翁姑慰甚結

穉未數月子以傷寒疾卒女抱屍痛哭聲淚俱竭隱瞞昔殉夫意懼傷翁姑心緩之三日後晨起以小故大肆勃谿翁姑疑之蓋已於隔宿吞金矣未幾腸斷而死王哀悼之爲厚殮焉天津有湧源鄭某者年五十餘妾陳氏年二十二小家碧玉也鄭某抱病氏衣帶不解湯藥親嘗割股以進竟不獲效氏哀毀骨立哭泣失聲屈金簪作餅吞之婢媪勸慰之曰人誰不死死得所何憾乘間益以金飾遂畢命焉粵東南海城西陳氏女名瑤環適江西黃姓子姑目雙瞽事之不衰結褵年餘夫以療疾卒女哀毀不欲生以盲姑在堂不敢殉未幾姑亦卒喪葬盡禮一日託詞省親舟至斷港自投於淵潮流迅疾榜人援救不及越日得其屍面如生聞者哀之大府爲請旌焉烈婦倪氏者江蘇句容縣人慶落次女也姆訓素嫻適高君星聯高故山陰人少失怙家貧乘讀以幕爲生烈婦來歸事適姑持家計既孝且勤咸賞賢之光緒己卯周震軒爲明府

在儀徵任建醮脩邑廟明府弟捷三知高君熟諳工程延監視蓋捷三  
乃高之妹婿也高乃挈家居儀壽甯井然工賴以成高由此心力交瘁  
患疾遂卒烈婦措理裕如殮前一時許烈婦臥房中人謂勞憊視之則  
神色慘變未兩刻即氣絕送死養生立後繼絕明府昆季爲經理焉又  
林女者南雄人居仙娥之長與里性至孝精刻綉世有針神之目父某  
賈時運不齊謀無億中遂從人佐賈目疾發辭歸舊有阿芙蓉癖非有  
汲引者不能呼吸烟雲女乃學汲引法日爲父作烟臺侍女出閨有期  
矣會兩兄俱亡門祚凋零請緩婚期婿初亦高子自待矢玉堂歸娶之  
志嗣因慈萱日暮侍養無人擬取吉女又有喪兄之感遷延展緩不圖  
脩文促赴壻竟以急疾下世女聞訃痛不欲生旣思爲私之養可承休  
膝下矣時有楚南人失偶謀續膠絃有爲女執柯者林將許之女抵死  
不從誓言於母長齋綉佛以了此生母以告林林聽其言且家業已乏

藉可得重聘費不從所請女曰所天雖逝志不能忘背義適人泉台有  
知何以相對母曰未廟見者不得謂之婦何自苦爲女曰夫婦之道以  
理失尤以情切聞壻逝時猶執女所綉紫錦詩囊且令以殉今綉工未  
化何忍背之且父烟霞之養亦未可廢也林竟受其聘帶女知事不可  
回乃遺絕命詩十六字曰所天已逝所志未遂幽咽夜臺死心如醉潛  
吞阿芙蓉膏而死林乃悔無及已又天津某村去城二十餘里有某烈  
女者芙蓉其親冰雪其心當及笄之年許字白塘口某氏子將卜于歸  
而某子竟卒女痛絕者再屢欲身殉爲防閑不遂志因泫然曰母前謂  
女子之義從一而終今此身已字某郎中道殂歿決不忍以存亡易節  
必欲未亡人苟延殘喘請過門奉姑嫜雖九泉未獲唱隨而二老得承  
甘旨私心竊慰否則之死靡他有如天日若欲重諧秦晉再結朱陳則  
與斜抱琵琶過別船者何異僕實羞之父母勉從所請素車白馬過門

成服哭泣哀痛旁觀無不動容既乃奠湯操作定省晨昏曲盡孝養翁姑交慰無何姑病歿女悲憤欲絕呼籲無門哭勞寡媳事一鰥翁女蓋有死之心矣猶幸室有小姑二女同居嫌疑可白閱四載餘小姑將出嫁女於是伶仃孤苦展轉迴腸應門無五尺事實難堪居室只兩人心雖諒只乃絀粒十四日彌留際有以加餐勸者女不顧一絲僅屬力疾匍匐起拜翁前口不能言惟有此泣俄而氣絕顏色轉怡津人重出殯之儀醴資襄其事爲合葬焉嗚呼是皆無偷生之意有必死之心故能從容盡節百變不回生則同衾死則同穴此志殆可不少緩也以勵薄俗其庶幾哉

世祿之家日爛詩禮其能從容赴死以明節操者且或不易觀矧在風塵中人乎及讀湘江愚叟節烈傳乃知風塵非無人也烈婦姓李氏曰玉桂有聲北垓漢固孔道爲狹斜遊者輒譽之長沙李孝廉素謹愿計

偕赴禮部試三五少年招邀過妓家相笑謔爲樂無足當妓意獨屢目李或戲曰愛李郎耶若果爾當爲若媒是固將買妻而難其選者妓笑而不言旣而耳語李曰若言信乎李誠告之妓曰淪落天涯託以終身孰如君厚而肯一援手乎顧非多金不獲脫籍橐中裝如不足當自爲謀李猝無以應固強之乃訂春闈捷後約李旣行妓於是枇杷門掩厭倦風塵矣客或有迫之見者愁斂雙眉非復疇昔明年有從京師歸者道李落第狀妓則惘惘如有所失淚落尊前見者咸悽惻或爲致書促踐約李題詩扇端寄之未至而富商某欲得而甘心焉遽以千金奪之去妓皇急不知所爲衣不解帶絕粒七日仰藥死李聞而哀之繪圖爲記兼徵詩文焉又節婦某氏蘇郡某大令妾也幼而失怙誤陷平康送舊迎親非素志也始與玉器鋪某甲有婚嫁約某甲限於力不思繼乃爲大令脫籍主婦不容大令携赴粵東隨任數年大令卒任所扶柩歸

蘇主婦仍不容欲嫁之氏矢志不奪令之戚屬爲賃數椽以居之某甲  
覩氏携有宦囊欲賦求風人財兩得囑舊嫗通款曲婦力却之一日甲  
詣氏所氏見甲目蕩神搖正言以拒甲備述苦况婦慨然贈以洋餅二  
百餅曰是區區者報前情耳文君之行之死不爲甲意未足越日復往  
以覓死詐氏憤恨交迫恐敗聲名乃服毒自盡焉甲與嫗席捲一空隣  
保知婦爲甲脅因而盡節甲被逮並追盜賊焉嗟乎之二人者境遇不  
同也而爲節烈者則同要皆爲人所脅以至畢命非明乎不再適之義  
貞定不移不克毅然爲此也若夫朝爲秦雲暮爲楚雨章臺柳枝以爲  
固然則誠是二人之所深羞也雖謂風塵中果無人哉

節婦殉夫亦其人哀痛迫切自戕其生未聞有逼以出此且集衆而共  
觀其死者如福州哈去村一事實可異焉村中有新孀婦不詳其姓氏  
年甚少親族逼令再醮婦不許願以身殉夫親族不之勸擇於某日縊

死於親族之前婦先期宣示於衆豎立一架屆時自登於椅取繩繫頸  
辭別親族兩足空懸卽時氣絕婦之節烈可敬可哀獨怪爲親族者豈  
皆忍心悖理見死而不救耶抑皆欲其死以成節烈之名耶甚矣此惡  
俗也移風易俗是所望於官斯土者耳

苦節艱貞生死不移實有各極其遇之苦者矣至於一絲既定而畢世  
堅貞者雖曰守義其情尤堪憫焉朱氏婦者潘公瞻園女也年二十餘  
歸朱君省三爲室舅姑具慶甚相得也結褵不半載省三病亡省三固  
獨子乃立從堂姪爲嗣年甫四齡氏撫養備至無何翁歿治喪盡禮竭  
盡心力姑復老病臥牀家道凌替減獲悉去湯藥飲食氏一一躬親課  
延三載始卒會庚申難作子爲賊害氏懸梁投水多方覓死皆以救獲  
免嗣寄養內姪婦家以針指爲活計守節數十年備嘗艱苦云

揚城周氏婦家道式微夫就館陝省已卯春間一病不起居停爲營殯



葬周婦聞之慟甚欲往扶柩門衰祚薄屬託無人乃自携四齡子赴陝  
居停主遷調他處依函云葬所覓之跋涉艱難於某月盤回祖墓地逾  
千里時歷七月莞莞弱質獨涉關河落落殘魂得安邱隴視氏則心堅  
似鐵骨瘦於柴其苦蓋可想矣里人擬爲詩旌云又某姓一子雙祿病  
沈篤妻某氏小家女也夜深時以厨刀割股煎湯和藥而進病勢仍未  
殺越二日竟逝氏刀創甚劇哀毀迫切遷延數月始就安帖

嘉定施節婦者本小家女結褵未一年夫卽故上有孀姑下無遺息莞  
莞孑立茹苦含辛竭盡婦道以代子職節婦固之死靡他焉不意七期  
未滿骨肉未寒姑也有不良之意窺媳少艾私受某氏聘金逼之再醮  
託言探親挽媳出門乘車而往媳至門見人衆可疑因卽效毀春斷臂  
事欲抱夫木主赴邑署呼冤隣戚勸息之晚回臥室自念未亡人難與  
姑論且難刻防仰屋興嗟乃引白練三尺作畢命計以完貞守幸獲救

免姑亦知理屈乃誓言要約焉自是白首相安姑不爲偏離之計青閨苦守媳復盡孝事之常西冷生有長歌以紀其節云

節婦陳氏太平沙人龜村中黃其次子未踰年夫亡素嫻大節執從一而終之義欲爲黃氏未亡人守節終身雖小家女而其志堅不可奪亦女子之至苦境也爲翁姑者倍宜體恤矣詎翁固酒蛆也温飽之外都無所計家政一切惟妻主持焉妻素溺愛長媳而長媳又與陳氏差池臭味不相投契面善心違殆非一日迨夫弟既亡卽視其媳爲贅沅恨不且暮去之也譖於姑曰嫗年太少且無子女姑宜有以善處之姑謂花貌綺年未必能甘岑寂舉止且儻亦不類守節中人微汝言吾亦將有以遣之陳氏固父母俱亡乃使媪向其媪微示意不數日陳氏歸痛哭謂翁姑有不容守節之意媪曰早知此事矣媪來由姑容若何陳氏曰我心匪石之死靡他但伊家不能容納我我卽歸媪家茹苦終

身亦甘心也。嫂謂此未可遽爲也。無論兄家無擔石儲蓄，不遑兼顧，卽同甘飢餓，姑正青年而伊家且絕類如此，亦奚必爲其門戶起見，乃徒自苦爾。陳氏曰：我盡我節，均非有爲於人，我豈以人不相容遂改之哉。翌日遂仰藥而死。經救獲甦，翁姑感其節，乃遂其志焉。

吳氏，叔之巾幗中才女也。適汪君，亦文學士，伉儷甚篤。綠隴人，聯夫唱妻和，吟詠不已。人生樂事，殆無加於此。未幾汪逝，氏孤苦伶仃，柏舟永矢。以老母在堂，不敢殉。隨母家居，端園每於風清月白時，携綠綺於梅花亭畔，揄長袖，出纖指，彈湘妃怨一曲，沈鬱頓挫，如泣如訴，嘗有冷夢未成，燈自滅，畫樓怕聽角聲聲之句，其哀思可想見矣。

江都黃輝山茂才長子某甫，冠聘妻金氏，結綢有日矣。一日爲瘋犬所傷，緣黃家素畜一犬，也愛之甚，禁不出戶。嘗春求偶，被禁成瘋。黃子正與客小坐，犬至，投以食，犬不食而奔人，將黃子脈門一口，嚼定，羸僕

力擊始寤視所嚙處噴流血醫藥罔效逾半月遂歿金氏聞之堅意  
過門守節父母翁姑嘉其志從之擇日成禮既畢更凶服兩家皆流涕  
焉

嘉定南翔鎮張氏女年十八字同里甘姓子爲室吉席有期甘忽病逝  
女得耗大慟水漿不入口者數日欲絕粒以殉焉父與伯叔再四勸解  
女欲守貞畢世父以年輕不允女乃至邑署鳴鼓自訴邑尊廉得其情  
善言慰勸女言決無後悔邑尊嘉其志堅書貞節可嘉四字以贈並銀  
四緡令自備匾額焉於是擇期送女至甘氏宅父亦盛備奩具觀者如  
堵嗟乎節操一生嘉名千古誠足爲巾幗之光抑思其飲水明心毀容  
示志其情境之慘固極人生之難堪者乎聞其風者肅然敬慨然傷已  
貞節之風閨闈所難乃禮法所型至於一門克化則許氏之貞節尤足  
傳已某逸民撰記曰聞之始志能信懷水霜而倍潔貞心永矢與金石

以同堅儀型克相於夫家萃一門者難得模楷足風乎世教恆百代以流芳此爲前署兩淮鹽運使許君次蘇之合門事也都轉長姊適蔣氏夫以力學早逝嗣姪爲子猶爲襁褓中物家既貧奉姑尤謹都轉欲別居任所辭不出有所饋悉獻於姑囑來使曰我在兩不飢我去姑何依乎苦志事姑誓以終身歸語爾主母以我爲念壽六十卒子雖立貧如故殯葬之具都轉季子秋槎爲具備焉其芸亭五弟婦於氏夫既歿欲以身殉哀號數月憂鬱致疾瀕於危者屢矣都轉之遣室聶氏舉一子夫忽病篤刲股以進天違人願茹苦未申哀慟欲絕族黨以呱呱猶在抱也僉爲勸聶氏乃收淚言曰夫死我不欲生我死子倚何人由是勵節訓子親串咸欽之都轉長子晉笙病危繼室楊氏親侍湯藥衣不解帶者累夕夫既逝植節自苦無異寒素閭以內措理肅然穆如也都轉次媳李氏年未二旬夫卽殤存一女弱息孀居節操尤謹嘗以藜藿刻

以苦自勵也是皆知崇四德堅苦節於松筠化及一堂勵貞操於茶葉  
矧家傳世系遵禮法而克中最高難教治閨闈表清名而弗替謹就訪俗  
所及作爲訓俗之辭願採風者發潛德之幽光傳之不朽云爾嗚呼是  
雖未邀 旌典而貞節之操光於宇宙萃於一家其足以風世而勵俗  
也豈淺鮮哉

揚儀交界之地名橫樹灣隔河橋比僅數十家有某家業織席夫婦二  
人僅一女婦故大家婢知書同治元年賊時過境肆掠婦恐不免即  
暗書夫婦生年月日並女生日製二塊肚絨之婦與女各束一為賊解  
滅女父母均死女爲一湘勇挾歸湖南身本男裝時已十歲勇死女又  
爲一川勇擄去予之深自韜晦人皆不識爲女子身迨川勇入隴寄女  
於戚教以讀書識字姓以金名以傳緒儼然一書生也由是結識同鄉  
遂隨吳制軍官眷船東歸至漢陽遇有赴左帥營者作書別父細訴衷

曲由曉返揚已改女子裝盡女爲吳夫人侍婢數月矣女所歷艱難險阻慧男子尙未必若是慎密乃出於十數歸閨之身轉徙數省合浦珠還而抱璞守真瑩然無方玷以古之木蘭殆後先相映矣奇哉女也林愛官白問其家女也幼失怙恃入青樓年及笄溫重寡母不喜效飾綽有大家風範居恒以流落爲戚既與長安雍生遇兩相狹洽繼訂白頭約願雍一翻翻書記耳囊囊蕭條荏苒數年不能出其籍林亦自矢不他會雍友陳生悅林色求通燕好林不可強以搗母命辭不獲比入帷林肩戶出白劍膝跪前請曰妾本博命生死不足重軀所以苟延有待者以身隸烟花尙復貞一君家擁花園柳何處不逢佳麗若必快制言歎欲汚吾身請先汚吾劍言訖以刃割立妝臺陳驚曰余固知爾鍾情雍生久矣如力不滿何曰不滿則以死繼之不然懷此刃何爲者陳性固仇爽不吝施與乃慨然曰爾識雍余豈不識雍哉子爲若成之啓

戶遽出覓雍挾至出金條脫二枚付鴉母曰林不爾向矣舍女取金爾之見機也不從吾言曷觀此刃鴉母皇懼無言竟歸雍同人撰聯句頌其義曰果然匪我思存一段姻緣完白刃真箇爲人作嫁千金聲價贖青樓始則以白刃相仇繼則以白刃受恩此林之所夢想不及者也世有此人當鑄金事之

嘉應州侯姓失其名世業農有女一人年方二八姿質過人頗不類田家女勤於紡績終日在室固未嘗拋頭露面於外也適農事興盡室赴田刈麥母亦餉於西疇僅留女守門戶女粲粲在室偶至門前覘母媿返否適遇比隣孫某蕩子也以言挑之女不願而入孫某旣斃其色又稔知舉家在田突入其室女避匿房中孫曰有言與若母相商女曰母不在家可速去孫乃以淫穢詞調之且欲闖入臥房女閉門不納罵不絕口遂以剪刀由門上擲之孫度不可強倉皇走出遺一扇一帶於地



女忿恨未已不敢啓門孫出門知扇帶遺失急欲回取適女媿自田間回不敢復入媿見孫神色有異步至庭中得一扇一帶異之疑女與私納諸懷中曰諸翁媿翁怒曰彼無賴子聲名狼籍伺吾等出外而來遺物於室是女之不肖也吾先置女死而後陰圖孫某焉媿曰女非無恥者流紡績十年並無出入不禮之端待察情形可乎翁不聽女遂自經時隣村有孔某者巨族也富而無子一女年十七因病而故父母方痛恨欲絕女忽甦而起曰此何處耶此何人耶我胡爲至此也家人詰之自言侯姓某村某人之女冥司嘉我貞節賜數亦未諳判令借屍還魂言畢即欲回家以白前生冤抑家人阻之招侯至女逕前抱父痛哭備述冤狀且欲隨歸孔不可侯勸慰乃止噫聽言不察鹵莽僕事夫固貽咎無窮况乃以死迫乎若魂竟不返冤沈九幽矣借屍一舉雖涉荒唐誕妄要可爲鹵莽者戒也人尚不愼於聽言哉

韓文杜詩讀之者於汪洋浩瀚中綽有規矩可循卽考据字義所謂無一字無來歷者信不虛也如工部懷古詩羣山萬壑赴荆門生長明妃尙有村前人略而未註或謂荆門卽今之荆門但去秭歸三百餘里於義未合有子役巴東者歸言過其地在歸州東北四十里有山名荆門羣峯聳峙惟此山獨低且中凹類蜂腰山下有村名香溪蓋當年產明妃處也似此則人之以杜撰論者皆未嘗親歷其境者也坐井觀天以蠡測海此固淺陋者之常亦曷弗以不解解之噫學如淵海天下之難以窺測者又豈獨韓文杜詩也哉

因時生感卽景言情此固典到筆隨以寫其憤懣抑鬱之志者也若夫花晨月夕詩酒流連是又風流自賞超然於名利之外者矣如郭頰伽先生於八月八日夜小飲薄醉姪女阿茶言曰上巳端陽中秋重陽皆爲令序如月色佳時卽中秋菊花開日卽重陽似此良夜何可辜負曷

不作探中秋詩先生曰可因吟曰杜門長夏治幽憂暫返西湖亦近游  
容易家居三五近相將沽酒十千酬膝前姪女頗解事醉後狂奴不識  
愁叢桂已馨小蟾白商量排日作中秋誠可謂家庭韻事矣都門每屆  
冬令灤河水凍設立冰牀便行路也風雅之士聯絡數牀聚於一處圍  
爐飲酒烘硯賦詩如入晶窟如泛銀湖信足樂也某茂才才藻富瞻口  
占一詩警切異羣云駛於走馬小於綉滑消歌中亦足豪上下不交人  
自冷風波一息枕方高但憑堅腹消行險略藉橫肱寫夢勞直似游仙  
塵境裏瓊壺咫尺忽周遭此又別開生面也文人筆墨隨在皆寫天機  
若必於跡象拘泥求之則鑿矣

詩本天籟隨機而得古終朝咕嗶而不能吟隻字者有不必爲文士而  
亦能居然成章者詞雖不工要其道性情一也嶺南李某者武弁也年  
五旬日隱於市廛向在軍營備歷艱辛事非其主僅保把總鬱鬱不得

志乘而歸來貌雖偃蹇肩宇則饒有英氣一日與嶺南羈士相遇沽飲  
小憩航酬交錯議論風生李連浮數大白曰君文人我不解章句有俚  
言請政可乎羈士欣然曰請李遂口號四絕曰營門更鼓戴寒星猶憶  
從戎兩鬢青萬文光芒騰虎氣腰間寶劍血風腥霹靂聲中殺氣黑鎗  
矛接處陣雲黃便須匹馬橫衝去刀下頭顱落電光迅如鷹隼疾如鷄  
屢破堅城躍甲橋不是命輕同艸芥督兵爲有霍驃姚可憐李廣不封  
侯百戰歸來漸白頭我欲問天天不語一腔熱血滯吳鉤慷慨淋漓吐  
壺幾爲之碎羈士肅然起敬云關中觀者嘉定錢竹汀宮詹之老僕也  
宮詹退食之暇吟詠不輟僕陪侍十數年耳濡目染間能拈韻顧多俚  
語如題鐘樓云遙望鐘樓一座方當中顛倒挂銅缸東邊撞起西邊響  
隱另隍琅隱另隍結句蓋狀其聲也過江斷句云所以當年關夫子開  
揚先唱大江東別饒風致足資藝林嘉話要之能詩者皆盡性靈李某

馳騁疆場英銳過人而竟不得大用宜其詩抗爽之中有憤懣之氣固不得僅以武弁陋之若關某不徒爲紀綱之選而兼爲風雅之助則亦天之生是使獨者矣嗚呼豈易易哉

女子無才便是德世人類言之然能恪守閨箴雖遇人不淑而無交謫之聲則才德兼備矣鹽城有才女者不詳其姓氏嫁夫某業儒家貧甚而伉儷頗相得屈天中節杼軸其空幾不能舉火女詠一詩云自憐薄命嫁窮夫明日端陽件件無佳節莫教虛過去聊將清水洗菖蒲書於案頭夫見之殊自愧忽忽去明晨操豚蹄酒一盃以返邀妻大嚼妻不解固詰之笑不答未數日吏胥拘夫去蓋端陽酒肉之需從鄰家竊牛來也縣令詰實某遂口誦妻詩因逮女問曰汝既能詩可面試乎女曰可令遂以竊牛爲題女口占云滔滔黃水向東流難洗今朝滿面羞自笑妾身非織女夫君何事效牽牛令大加擊節遂赦其夫爲贖牛歸之

鄰家並給白銀二十金以濟其貧嗚呼令可謂風雅愛才者矣若女也巧思天成冰清玉潔謂之才女也可謂之賢婦也亦可

詩必窮而後工古人謂然有窮而不盡工詩者亦有能詩而竟至漂泊者非詩累之也才使然也京師某鉅公遇一丐者追呼求助衣衫藍縷而吐屬風雅聆其言則云周急不濟富何惜一文錢某異之詰姓氏住址丐操南音稱係江南秀士聞柳尋花揮金如土金盡途窮親戚唾棄故爾一貧至此並誦自懲一詩云夢入揚州不數年迷離酒國與花天而今落魄燕山寺百結懸鵝丐一錢某給青蚨百數丐遂吟哦而去蘇城有高某者耽吟詠以舌耕爲業一日有江北災民哄至高方攤紙屬稿賦感懷詩拈寒字韻其中上一句云有限年華催老易想久不屬忽一廿餘歲者援筆續之曰無靈文字送窮難高大服留之坐不應贈以青蚨受之間其姓名復口占二語云他時得志終相報此日相逢實自

慚不告而去滬上有一婁婦年約五旬持白紙粘牆隙躬親握管而書其略云籍隸雲南太和縣人隨良人遊幕福省漳州公餘餘暇選韻徵詩倡隨樂甚乃以造物忌才良人病歿一空依傍漂泊難歸擬往江西玉山縣投親道經申浦阮囊羞澀行止兩難淪落天涯途窮日暮而又不甘爲沿門之乞倘有垂憐俾免爲異鄉之鬼啣環結艸後報富圖末繫一詩曰自歎今生命不齊十年漂泊望江西此來悔托沿門鉢滬水淒涼得句題噫風流自賞淪落窮途皆才爲之累也豐其才畜其遇古今來豪傑大抵皆然又豈獨工詩必受窮哉

甲聯挽章所以誌哀感也凡人生平學業政蹟卓卓可見者率以數句括之故情深文明堂皇正大非名手名筆吐屬皆有煙火氣若夫褒揚巾幗則尤難出色矣沈文肅公配林氏文忠公女也當文肅守江西廣信府時髮逆逼城下郡之民遷徙四出公與夫人堅守不去嗣得梅總

戎饒臣救樓園遂解公卽擢九江道是役也夫人之力居多癸酉歲公爲船政大臣夫人於中秋日病歿輓聯極夥惟落楮張魯生司馬一聯爲冠云爲名臣女爲名臣妻江右佐元戎錦繡夫人分偉績於中秋生於中秋逝天邊圓皓月霓裳仙子證前身語皆紀實貼切不移又文肅公喪於兩江督任寅僚輓言屬集惟桐城甘愚亭大令一聯云慕公可謂賢哉嘉定雖曰罷歸無怨言猶感知已武侯從令逝矣廖長沙誰能起用常痛哭恐爲廢人蓋甘君前於署崇明縣任內因公被劾故一引葉天顏劾陸清獻事一用三國志廖立傳語也工切無倫一時題之蘇撫吳公子健太夫人迎養撫署辛巳五月五日病故時奉 安太后遺詔有昭文令陳明府鈞堂輓以聯云一德君臣同悲愛日三吳士女爲罷端陽寥寥十六字大氣包舉俯視一切真可於膠山緝海中獨出冠時矣其他則自櫓以下無譏焉閩督何公小宋配吳夫人生出名門



長歸望族夙姻閨訓隨任南北省相夫教子長男耀章出守粵西三男翰章已卯舉人辛巳春正月立春前一日無疾而逝福氣之大全受全歸一時挽聯之盛美不勝收惟何公挽其夫人一聯膾炙人口爰錄存之勤儉本家風憶前割臂療姑愚孝回天吾不及音容空想像縱使承顏有子衰年喪耦淚難收一字一淚如泣如訴令人不忍卒讀所謂情深而文明者其卽是耶無情可言則又取乎詞意正大包掃一切斯無覆瓿之誦天下之輕意擷管者其試思之

楹聯佳句往往有集成語而極其現成者有湊集法帖之字而成句工緻者妙極天然莫可訾議聞京師內人近撰一聯云五科殿撰備五行金木水火土四川封爵凡四等公侯伯子男所謂殿撰則戊辰洪鈞辛未梁耀樞甲戌陸潤庠丙子曹鴻勳丁丑王仁堪也所謂四等者公岳鍾琪伯許世高子繼超男楊遇春楊於嘉慶十八年世襲甲寅迨歿

後加侯爵按封爵各省均無五爵之封川省獨備是亦 熙朝佳語也  
又江寧貢院自癸酉科藩司梅公小岩提調院事運水入關高屋建瓴  
鑿壁穿泉免挑運之苦受汲引之福一生注水烹茶拈茶烹鑿壁泉五  
字措對久不屬良久大呼五百年前已天造地設一對明人筆記中不  
有烟鎖池塘柳一句乎五行各備合號噴噴稱贊以爲得未曾有云故  
並錄之

集句成聯自寫心胸然亦一時靈機所觸故皆妙緒天成耳聞壺居士  
書一聯以粘壁曰大白狂浮客舞劍小紅低唱我吹簫並跋其後云上  
聯是英雄氣下聯是兒女情人之所以爲人也用得其中爲聖道下此  
則參得透把得住爲禪關否則暴其氣以溺於情耳又作數聯以爲斬  
魔之符銘諸座右眷屬神仙夢生涯翰墨緣事到悔時已無及人非交  
過豈相知對天欲訴不平氣入地偏多未了因掩耳不聞非分事存心

還是有情人自有文章何必顯絕無骨肉乃真窮其贈友聯云彼蒼將  
我生何用知已得君死亦安觀此可知其心之憤懣世界茫茫亦經過  
幾番閱歷矣有才不偶抑鬱無聯洵可惜也

爆竹一聲除舊桃符萬戶更新新歲人家遍貼春聯由來舊矣紀文達  
云楹帖始於桃符以蜀後主餘慶長春一聯爲最古由宋而降宜春帖  
子多用對語且以朱箋書之或集葩經吉語或集唐宋人詩句其相沿  
可考者如王沂公皇帝閣立春帖云北陸凝陰盡千門淑氣新明太祖  
召陶安爲學士御製門聯賜之曰國朝謀略無雙士翰苑文章第一家  
我朝 聖祖賜桐城張文端相國立春帖子云天恩春浩蕩文治日  
光華張氏歲歲貼之今則比戶皆然矣日月光天德山河壯帝居此陳  
後主入隋上文帝詩也率脩厥德長發其祥集葩經語自爲成德物華  
天寶日人傑地靈時引王勃滕王閣序各增一字後人沿用不察實皆

有所本也吳孟舉有詩云兔園本子漸無奇不用冬烘賢巧思除却宜  
春方勝櫟家家傳寫盛唐詩周宗泰姑蘇竹枝云學書兒竟弄筆勸春  
聯幅幅賣斯文人來問價增三倍不使鵝羣籠右軍亦可見風俗之相  
同矣降自今日京師風俗新年必換春聯宦商士庶無不以朱箋貼門  
煥然一新鋪戶對聯大率以首一字用本肆字號集成一聯無論有虛  
實不對者而一聯中爲此一字拘定頗費心思支離牽強者固多而妙  
合天然者亦間一有之如慶樂戲園聯云慶春王正月樂天子萬年堂  
皇正大無以過之慶仙居大酒缸聯云慶喜昇平開酒國仙居日月駐  
壺天大酒肥魚豪士興缸花杯影美人風上六字一一扣定又係本地  
風光相傳爲胡侍御作洵聰明吐屬矣他如瑞香樓棧房香鋪聯棧曲  
有雲皆獻瑞房幽無地不生香宏業鐘表鋪聯云宏業新開必表而出  
義氣相應如鐘自鳴首末扣定頗見巧思題酒家云勸君更進一杯酒

與爾同消萬古愁書場云把舊事今朝重提起破工夫明日早些來又如題鴉片烟館云重簾不捲留香久短笛無腔信口吹以放翁詩對鄭震詩天然之巧不可思議亦傳世之一端也

除夕送窮之舉文有韓文公賦有楊子雲風流佳話歷古今而不磨乃亦有仿而爲之作爲楹聯者亦可憫其志之悲而境之塞也至於諱富爲貧則品斯下矣京師人烟稠密甲於天下富家竟購千竿爆竹付之一炬貧乏家卽謀食維艱索逋孔亟亦必爆響數聲香焚一炷除舊年之瑣瑣卜來歲之蒸蒸日上習尙類然也某君名孝廉也博通經史著作極多出爲大令迂拘忤世遂辭職京居甘清苦然四壁蕭然一甌外無長物矣除夕夜自撰一聯云放千枝爆竹把窮鬼轟開數年來被者小奴才機累俺一雙空手燒三炷高香將財神請進從今後願你老夫子保佑我十萬纏腰雖近俚俗實寫至情有過其齋讀而誌之可知其清

况之苦矣又某君以貲聽入部曹家有餘貲性慳吝諱言富衣服故作寒酸態人多鄙之其大門楹聯則暗藏富戶二字云未若貧而樂誰能出不由彼固不知也見者皆竊笑之蓋倩友代書友故作此嘲之耳詩云善戲謔兮不爲虐兮其殆是與

青樓楚館騷人詞客雜沓其中投贈楹聯障壁爲滿求其情詞蘊藉天然工趣甚難然時一得之如秋英堂女妓對云秋水爲神玉爲骨芙蓉如面柳如眉聞此聯係許滇生尙書集以贈淨香堂伶人長春者秋英長春別字也人復勸襲以贈妓亦取其工雅耳春復堂伶人對云春爲歲首復見天心聞妙堂伶人聯云聞歌起舞妙句欲仙伶有號如雲者聯云如何人不寐雲在意俱遲妓有號素雲者深心託素素盪胸生層雲落落大方均現成而有趣者信不乖乎風雅矣若夫酒食游戲日相徵逐本不知風雅一道狎昵之言稠人廣肆哆口高談蓋比比然矣或

亦贈以楹聯論成俚句要皆榛蕪滿月惡俗難堪而妓固不知也乃猶茫然曰此某客之所贈人雖有識爲淫褻勸付祝融妓猶不敢恐觸客之怒也滬上妓名琴仙者有友入其房見妝臺一聯云琴瑟和叶盡美矣謂武仙容頭杳有是哉叮嚀遂不禁掩口葫蘆矣又有贈十全妓者一聯云十分如我意全不怕人聽純是譏諷之詞乃猶高挂楹間夫可哂也嗚呼妓目不識丁者也豈無絕妙好辭或則上下聯倒置或且束諸高閣而此鄙俚無文之聯懸遍蘭房不忍棄去斯文掃地亦可歎耳寶劍贈於烈士紅粉餽於佳人不信然乎

生稟異質幼而岐嶷不與人同如唐之李鄴侯七歲能屬文張九齡戒之亦謂才華早露必多福薄也然亦有不盡然者總視乎其家之培植如何耳某鄉有神童七歲能背誦黃歷一本書卷亦熟長好游冶未冠而天可知飲食教誨不能稍寬實備恃天資而不盡人事鮮有不敗者

蘇城張氏子五歲入學初讀大學應口成誦日凡四五頁數日已完七八歲卽熟七經爲之師者自審才力不逮已三至而三郤矣又錫山陸爾熙女有神童之目方九齡塾師曾以春風狂似虎令對女應口而出曰秋水淡於鷗以成語對成語妙不可階掃眉才子其信然矣要之男子聰慧夙具父師苟及時訓誨大器可成若女子有才半爲造物所忌亦何若稍秘英華而養其福也然天之生是使獨也又豈在尋常意計中哉

文字標榜時風所向至於反唇相刺則有傷風雅矣薛君慰農掌教金陵某書院偶作白門新柳記一書述秦淮之近事續舊院之叢談蓋亦畫舫錄板橋記之例耳風流韻事本無關夫政要時議因禁樂籍當事爲李公雨亭以此書爲罪首禍魁爰劈其板且於書院扁試之時各致譏彈一則曰勸農詞一則曰喜雨亭記於是大相反唇文字之釁可不



長哉白門士人撰有楹聯以記之其聯曰喜雨亭記勸農夫詞官場與  
詞場互肆譏評果誰是絳帳生徒白門楊柳風流本風雅偶然遊戲亦  
何妨詞雖不工亦可見士林之清議云